



耳溪集
十五

墓誌銘

共二十二

~ 16
2330
15



和
2330
卷2/5

耳溪集卷三十二目

墓誌銘

始祖國學直學公墓誌

始祖妣順天金氏墓誌

都僉議舍人洪崖公墓誌

密直使公墓誌

寶文閣大提學公墓誌

巡衛司郎將公墓誌

生員公墓誌

先祖妣光山金氏墓誌



右軍司正公墓誌

先祖妣竹山金氏墓誌

右部副司正公墓誌

司圃署別提贈左通禮公墓誌

先祖妣淑人全州崔氏墓誌

部將公墓誌

副司勇贈左承旨公墓誌

祖考郡守贈吏曹叅判府君墓誌

先府君墓誌

先府君墓小誌

繼妣貞夫人坡平尹氏墓誌

內子貞敬夫人東萊鄭氏墓誌銘

仲弟成均生員墓誌銘

弟嫂恭人全州李氏墓誌

三從叔母南原尹氏墓誌

宗兄判敦寧公墓誌銘

禮曹判書致仕奉朝賀洪公墓誌銘

三愚堂洪公墓誌銘

Blank area with vertical lines for writing.



耳溪集卷三十二

墓誌銘

始祖國學直學公墓誌

此豐山洪氏始祖藏也始祖諱之慶高麗高宗二十九年壬寅以鄉貢登文科狀元實宋理宗淳祐二年也官至國學直學夫人順天金氏有二子長曰都僉議舍人侃以文章名世號洪崖季曰樞密使備舍人生密直使三館大提學侑密直生寶文閣大提學演世居安東之豐山縣豐南面申城浦仍葬焉寶文生郎將龜移居高陽麗訖累世不仕至五代孫大司憲

履祥遂大昌爲東方望族崇禎己巳大憲子霽按嶺南節省四世墓封樹立石後經兵亂子孫散遠地塋域爲土人所隱占己丑後孫萬朝繼按嶺南首訪先塋只得寶文墓於屬縣臨河而密直以上三代兆域未詳所在立碑於水谷以傳疑壇而祭 英宗丙寅人有指告者後孫重默吉輔山輔踵詣申城浦得破碑片誌於午山之小岡於是按誌而開驗乾坐者始祖墓也其下戌坐者密直墓也又其下亥坐者順天金氏墓也其東聖造洞辰坐者洪崖墓也並改封立表置墓田歲一祭當始祖墓之改封也夜始朝壙土

忽墳起溢坎露結如珠方覆土雨驟下有虹見穴左良久乃滅見者異之嗚呼凡世之得姓者莫不有始祖而其稱始祖者皆起於寒逃未詳其所自出固也若我始祖官旣顯矣又以洪崖爲子其後兩世接武館閣可謂焯然盛矣而乃其先無所考豈革世之際譜牒失傳歟安東人或言國學以上墓在某處某處未得明徵爲後孫者寧不愾然永歎乎謹識丘塋隱顯始末瘞於墓前使百世之後知爲吾始祖之藏也

始祖妣順天金氏墓誌

我洪氏始祖諱之慶以高麗狀元國學直學居安東

之豐山縣子孫仍貫焉麗革而文獻逸夫人姓氏不傳葬地亦中失我 英宗丙寅後孫重默等因土人言尋始祖以下三世墓於豐山縣南申城浦各得片石小誌子舍人誌云妣金氏在子侑墳尾亥坐孫密直使誌云祖妣順天金氏墓在突下亥坐於是始識始祖妣姓氏焉乃就密直公塋下開土而審方果有坐亥單壙在同岡之下端蓋土脉至此稍起而復低所謂突下也在一岡之端所謂墳尾也遂改築而樹以石嗚呼我始祖起自鄉貢取高科登顯仕肇立門戶克昌厥後蔚然爲東方盛族則閨門之內劬行種

德以啓百世無窮之基者必有所本而邈乎無可徵寧不悲哉然姓氏之始晦終顯乃在於四百年之後譜牒於是乎復明香火於是乎永傳豈非神明之默佑歟舍人諱侃卽夫人長子有文章號洪崖季曰樞密使備密直諱侑卽舍人公子兼三館大提學會孫以下詳始祖誌此不具載

都僉議舍人洪崖公墓誌

洪崖先生諱侃字平甫一字雲夫姓洪氏豐山人始祖國學直學諱之慶之長子宋度宗咸淳二年高麗元宗七年丙寅與文士閔漬同榜賜第歷官朝奉大

夫秘書尹致仕都僉議舍人知制誥間出爲原州牧
又以言貶東萊縣令卒于官卽忠烈王三十年甲辰
也後雪谷鄭誦以司議大夫謫蔚州嘗至東萊有詩
曰當日洪平甫波瀾起筆端高才不遇世晚歲此爲
官憔悴身仍病吟哦興未闌壁間無一字豈爲和詩
難蓋傷先生之不遇也先生娶三嘉吳氏司憲糾正
崇之女一男侑密直使三館大提學女適中郎將成
君阜密直三子長曰溟官弘文館仲曰演寶文閣大
提學季曰浚藝文館大提學一女歸宗簿副令李瑞
種卽鷄林府院君益齋李齊賢子也成三子準得尙

書有得政丞允得密直副使寶文生郎將龜見麗政
亂棄歸高陽已而我朝受命歷五世至大司憲履祥
以名德重一世其後官益盛族益大先生世居安東
之豐山縣人至今指其遺墟而獨墓地無傳 英宗
丙寅後孫重默等尋始祖墓於申城浦午山岡下有
誌刻其背曰子某趾在越河辰坐於是涉川而東得
先生墓於烽火山聖造洞改封而豎石始邑人壓葬
於其上毀塋而立碣忽大雷震擊斷其半未幾事發
罪其人而去其塚後壬午樵童獲片石於巖隙前刻
曰都僉議舍人知制誥豐山洪某辰坐遺誌配吳氏

在越河西坐妣金氏在子侑墳尾亥坐後刻曰弟樞密使備在考位下同坐長孫弘文館溟在水谷仲孫演妻尹得和女在越河庚坐噫隱之者惟恐不深而久乃自露夫豈偶然哉謹識塋域顯晦之由先系子姓之槩燔磁爲誌並瘞舊誌于墓前惟夫人墓在越河者似指申城而始祖同岡蓋有酉坐古壙焉未及改封慎之也先生詩有盛名益齋稗說曰洪平甫每出一篇人無賢愚皆喜傳之皇明詔使朱之蕃見海東詩選謂人曰孤雲詩似粗弱李仁老洪某詩最好佔俾齋金宗直選青丘風雅載公詩數十首而評之

曰孤鴈行懶婦引二篇是公自况云遺集佚不傳大憲子澍爲嶺南觀察使蒐輯爲一卷刊行于世崇禎癸酉觀察從弟豐寧君寶奉使如京師携入中國禮部主事孔聞漂見而大賞爲序其首而歸之

密直使公墓誌

我洪氏起於安東之豐山縣三世而有諱侑高麗忠烈王二十年甲午尹安庇榜登第壬寅親試文臣與曹匡漢同與選官至奉翊大夫賜紫金魚袋密直使兼監察大夫進賢館大提學寶文館大提學春秋館大提學上護軍事考諱侃都僉議舍人知制誥以文

章稱洪崖先生王考諱之慶文科狀元國學直學是爲鼻祖夫人鹽州李氏版圖判書致仕景茂女有三子曰弘文館溟寶文閣大提學演藝文館大提學浚一女適宗簿副令李瑞種其父名臣李齊賢也寶文子龜郎將藝文子保直提學女曰尹就進賢館大提學副令一子寶林政堂文學二女橫城君趙茂府使李元楠室也郎將當麗季退居高陽及我朝興蓄德潛光五傳而至大司憲履祥號慕堂其後遂爲冠纓巨閥始祖以下三世皆葬於安東之申城浦經亂失傳 肅宗己丑十代孫萬朝按嶺節立傳疑碑於臨

東面水谷里設壇望祭 英宗丙寅後孫重默等始尋始祖墓於申城浦得破碑古誌於其下碑片有辰向字誌則前刻曰密直使豐山洪某鹽州李氏合埋戌坐子演墓在臨河縣後刻曰祖妣順天金氏墓在突下亥坐遂塋土而驗之戌坐果雙壙也於是改封表以石始村人壓墓而室焉夢有異懼而撤去云

寶文閣大提學公墓誌

我洪自始祖以下三世皆葬於安東之豐山縣而至四世諱演則葬於臨河川前里鷹巖山臨河亦安東屬縣也公高麗直學諱之慶之曾孫都僉議舍人諱

侃之孫密直使三館大提學諱侑之中子亦文科嗣
爲寶文閣大提學賜紫金魚袋嘗知錦州事夫人尹
氏父得和籍與官不傳有一子諱龜生員龍騎巡衛
司右領郎將郎將三子南平縣令伊生員儀右軍司
正俶四女直長李肱原平君吳寧老集賢提學僕循
持平洪齡其婿也自郎將始居高陽而仍世葬焉縣
令之後散居羅州南平遂爲湖南人生員司正之後
最盛至大司憲履祥光前啓後代有聞人高官初臨
河墓被人隱占崇禎己巳大憲子霧按嶺南聞故老
見舊誌者尋兆於負子之原改封而樹碣夫人墓則

洪崖公誌云在越河庚坐蓋於申城同岡有庚坐單
壙而未敢質言嗚呼吾先祖在前朝旣奕世光顯矣
到今累百年益蕃而昌可見源深而流永積厚而報
豐顧其德美之實邈然無所稽斯後孫之所隱傷也
姑記先系子姓埋諸墓次尙有徵於來世乎噫

巡衛司郎將公墓誌

高麗承議校尉龍騎巡衛司右領郎將洪公諱龜安
東豐山縣人也考曰寶文閣大提學演祖考曰密直
使三館大提學侑曾祖曰都僉議舍人知制誥侃有
文章號洪崖高祖曰國學直學之慶以上無傳世居

豐山之申城仍葬焉公中生員試以蔭進見麗政亂棄官將歸故鄉道高峰縣愛其山川之美卜葬地遂築室而終老焉未幾國革公臨歿遺誡曰吾子孫生於王氏之世者毋應舉以沒齒可也以故公之後數世不振嗚呼高麗之季君不君國不國而若牧隱圃隱官旣隆矣義不可去故以身殉之其位卑而全節者惟吉注書徐掌令數人而已若公見幾於未亂之時超然遠引名與跡俱泯尤豈不卓然矣乎惟數世潛光積德終能大發於後天之報施於是乎章章矣淑人商山金氏府使中養之女大提學築之曾孫也

與公合葬於舍後歸耳面城洞其坐辛其祔左有三男四女男長南平縣令伊仲生員儀季右軍司正倣女直長李肱原平君吳寧老集賢提學倣循持平洪齡室也縣令子通政府使重孫府使樹郡守桂也生員子右部副司正哲孫也右軍司正子司圃別提繼宗也李子清新叅軍吳子孟昌伯昌大司憲益昌季昌倣子殷老同寅副丞洪子元淑南平之後散居湖南嶺南生員司正之後仍居高陽四世而至大司憲履祥名德爲世所尊門戶遂大昌

生員公墓誌

生員洪公儀洪崖先生侃之玄孫密直使侑之曾孫
寶文閣大提學演之孫本安東豐山縣人也考諱龜
以高麗生員仕爲龍騎巡衛司右領郎將見國衰政
荒退耕于高峰之野未幾麗亡臨歿誠子孫曰若曹
生於王氏之世不可事二姓公承父訓遂不仕以終
焉葬于所居歸耳面內洞艮坐之原孺人光山金氏
知司諫院事端之女別葬于公墓之右岡有一男二
女男哲孫右部副司正女歸縣令金幅柳承積司正
六男曰世仁世義世禮世智世信世敬也世義世信
皆官萬戶世敬官部將部將三男曰璋曰脩曰侑脩

實生大司憲履祥其後益蕃以熾爲東方之望

先祖妣光山金氏墓誌

高陽之郡歸耳之洞內谷之里有坐丑而獨壙者孺
人光山金氏之藏也卽知司諫院端之女生員洪儀
之配有一男曰右部司正哲孫二女曰縣令金幅士
人柳承積妻司正六男世仁世義世禮世智世信世
敬金一男夢權柳二男潭浦世敬之孫履祥爲 穆
陵名臣號慕堂生員葬於左岡亦有誌詳先德子姓

右軍司正公墓誌

豐山之洪肇自麗季直學之慶鄉貢魁第嗣侃舍人

文章名世曰侑曰演館閣相繼申城臨河實維桑梓
龜以郎將見幾遐厲南邁故鄉高峰爰止國革家完
名與跡晦季子曰俶韜光不仕司正之號隸於巡衛
生守遺誠葬從先趾塋維負壬洞曰歸耳嘉配媿德
竹山金氏壽藏相望異兆同里長男繼宗掌圃郎吏
次男繼祖短年無嗣女歸慎氏縣監自濟有孫禹甸
贈官承旨無育有後取再從子脩貳相蓋以子貴
實生履祥有德有位世稱慕堂官都御史種善之報
於焉昌熾子孫繩繩冠纓濟濟敬樹幽銘以詔來裔

先祖妣竹山金氏墓誌

夫人姓金氏籍竹山右軍司正洪公俶之配也司正
葬於高陽歸耳面城洞先兆夫人別葬於同里德洞
背西之岡舉二男一女長繼宗官司圃別提次繼祖
女適縣監慎自濟別提一男忠武衛副司勇禹甸縣
監二男履屋司勇無子子再從子脩是生大司憲履
祥詳在司正公誌

右部副司正公墓誌

右部副司正洪公哲孫豐山人也高麗國學直學之
慶之後曾祖演寶文閣大提學祖龜巡衛司郎將父
儀生員洪氏在麗朝連世大顯至郎將當革世退居

高陽子孫皆不仕事行遂無傳公娶晉州柳氏司勇
淙之女合葬于歸耳面內洞先兆負良之岡有男六
人世仁世義世禮世智世信世敬也世義世信俱官
萬戶世敬官部將孫男十三瑚璉世仁出處寬世義
出琛瑄世禮出土英士雄士豪士傑世智出季良世
信出璋脩倫世敬出也脩子履祥官大司憲有重名
號慕堂

司圃署別提贈左通禮公墓誌

公諱繼宗姓洪氏官司圃署別提贈通禮院左通禮
淑人全州崔氏府使敬明女豐山之洪以高麗國學

直學之慶爲鼻祖四代以文望大著至郎將龜當我
朝興遜于高陽季子倣官右軍司正卽公之考也子
曰忠武衛副司勇禹甸女婿曰趙榮孫趙忠俊司勇
無子取再從子脩爲後脩子履祥官大司憲洪氏世
葬於安東自郎將公始葬於高陽歸耳洞妣竹山金
氏別葬於德洞公之葬從母兆負庚而塋淑人則祔
於左岡

先祖妣淑人全州崔氏墓誌

朝鮮司圃別提洪公繼宗配淑人全州崔氏府使敬
明之女吏曹判書俯之孫知郡事驪興閔機之外孫

也舉一子副司勇禹甸二女趙榮孫趙忠俊妻司勇無子取再從子脩爲後實生大司憲履祥趙榮孫三子漢琮察訪漢琛縣監漢珍趙忠俊無子一女歸左議政黃憲別提葬于高陽之德洞淑人之藏在其左岡西坐

部將公墓誌

惟我洪氏自肇祖國學直學諱之慶四世大顯于麗朝至郎將公龜有見幾之明不貳之節仍數世韜光不見至部將公以長德稱公諱世敬副司正哲孫之子生員儀之孫郎將公之曾孫也公老居鄉嘗見村

人牽病牛泣而過者問之對曰我農人也以牛爲命今日載薪適市跌於冰折脚是以泣也公聞而憾焉時當公生日子弟買一肥牛將壽公公命以易病牛子弟曰吾牛肥彼牛瘠不可以供甘旨公曰彼牛誠瘠吾食則甘矣竟易之鄉里服其義至今誦之其他言行世遠無傳公娶慶州裴氏信忠女有三子曰璋曰脩曰侑脩之後最盛有子三人曰大司憲履祥佐郎鸞祥典籍鳳祥有孫八人曰大司憲霽監司雲掌令彙叅判彙判官霽府使霽長房出也郡守霆叅贊寶二房出也其後益昌大高官顯職相望也人謂積

善之報其來遠矣始郎將公自安東徙高陽葬於歸耳面城洞子孫遂從焉公之墓在同岡夫人耐枕戌而封

副司勇贈左承旨公墓誌

朝鮮宣畧將軍忠武衛副司勇贈承政院左承旨洪公禹甸贈淑夫人長水李氏合葬于是邑曰高陽岡曰德洞瑩曰酉坐從先兆也父曰別提繼宗祖曰司正俶曾祖曰郎將龜卽上三世也子曰贈贊成脩孫曰大司憲履祥佐郎鸞祥典籍鳳祥曾孫曰大司憲霽監司霽掌令彙叅判翼判官霽府使霽郡守霽叅

贊霽卽後三世也嗚呼盛矣此豈無所本而然哉必有隱德陰功受天之祐以開我後人而今不可徵後孫之恨寧有窮耶

祖考郡守贈吏曹叅判府君墓誌

我洪氏起自麗朝之季上祖國學直學諱之慶居安東之豐山縣子都僉議舍人諱侃有文章直節世傳洪崖集後兩世連以文顯入館閣凡四世葬安東生郎將諱龜麗衰謝官歸高陽已而我朝革命五傳至大司憲諱履祥德行經術爲世所尊稱慕堂先生脩食文峰書院是爲府君高祖也曾祖諱霽禮曹叅判

凡六世葬高陽祖諱柱元以 穆陵儀賓封永安尉
號無何堂葬豐德考諱萬恢有公輔器用廟堂薦官
判決事妣南陽洪氏監司命一女領議政瑞鳳之孫
合葬于東郊牛耳洞府君諱重聖字君則生於 顯
宗戊申六月二十五日幼而端重聰穎好文辭九歲
作詩曰不泛大海水安知天地壯識者稱爲遠器十
六虛齋申公歸以女贈之詩曰我讀洪生古體詩清
颺颺生牙頰鏗如天球發奇響矯如名駒展逸足
澹宕高潔世寡儔晉魏以下無此音知音者誰洛誦
子流水高山伯牙琴洛誦卽金三淵昌翁一號也府

君甫成童詩名已振爲先輩所推許於是大鳴國庠
一代才士未之或先焉 肅宗己巳 坤宮遜于邸
府君杜門廢舉甲戌更化始復就丙子中進士第三
名國俗重司馬魁士望屬於府君而爲主司所抑人
皆稱屈府君自負甚高政曹屢欲官之而辭之力暫
赴 厚陵郎尋免歸晚以大夫人年高黽勉祿仕非
其好也由 世子洗馬轉侍直陞六品歷諸寺曹郎
至僉正出爲石城金化甑山縣醴泉丹陽郡終于江
華經歷居官以興學愛民爲主於金化修孔子廟於
甑山建山仰齋廩諸生躬講試文教大興在丹陽也

民有不順父母者召致之前爲陳人倫其人感悔卒以孝稱嚴於律已不以一毫自膩少有不叶輒投紱而歸未嘗一二年淹以故官位不長而人亦以是重之家世貴華而雅尚清苦被服如寒士簾閣蕭然左右圖書於世事泊如也性至孝侍判決公疾嘗糞以驗吉凶大夫人躋九耄府君已白首矣常爲嬰兒戲一日天雨急雷火入內室衆皆驚仆府君獨以身翼蔽大夫人火卽跳出人謂誠孝所感爲文章本之六經矩繩於八子詩則少攻樂府歌行中歲以開天爲準當世名流如崔昆侖昌大李槎川秉淵趙后溪裕

壽洪滄浪世泰爭與定交結爲詩社風流翰墨照映一世槎川每稱詩有盛唐風者惟公一人晚節尤用力於聖賢書終日端坐專精研蹟與士友往復辨論多所發揮焉蓋府君平生操履不離繩墨而早以文辭著名故退然不以學問自居及遺集行于世然後咸識文章源於經術行義無愧古人斯可以表見於後小子復何敢言元配平山申氏觀察使暉之女卽虛齋也領議政象村先生欽之曾孫承法家訓有女士風宗黨式焉一男鎮輔不幸早世贈吏曹判書一女適縣監沈景鎮繼配全州李氏學生相仁女育二

女適庶尹鄭錫保郡守李廷衡判書娶領議政沈壽
賢女生二男長良漢改名良浩今判書次挺漢生員
才而無年二女適叅判鄭晚淳府使金亨大後娶學
生尹斗天女生一男鳴漢改名明浩今承旨縣監子
漢雲庶尹子殷祥直長敏祥天郡守子青進士良浩
二男樂源樂浚庶子樂汶樂濟二女李肅載李永翼
妻挺漢無子以樂浚爲嗣有女佐郎趙雲綱妻明浩
一男樂游進士樂源一男祖榮府君以乙卯十一月
二十六日臯復于江華任所始葬於東郊先塋傍二
夫人溝而從焉後二十七年壬午卜兆于鎮川龜灣

里與二配遷同日葬同坎其岡面坤其封左右祔其
距先君墓十里而望焉嗚呼府君行誼文章高一世
而沉淪下僚位不滿德人到今惜之良浩兄弟竊位
于朝累蒙恩贈至天官亞卿二夫人再加封誥天之
報施殆在是歟趙后溪嘗言洪某爲人溫厚豈弟文
亦如之其後必昌人以爲知言

先府君墓誌

府君姓洪氏諱鎮輔字景仁安東豐山縣人也始祖
諱之慶仕麗朝官國學直學生諱侃都僉議舍人號
洪崖有文集行于世生諱侑密直使進賢館大提學

生諱演寶文閣大提學四世皆葬安東焉生諱龜生
員郎將見麗季政亂棄官卜居于高陽歸耳洞生二
子長諱儀生員次諱俶右軍司正生員公生諱哲孫
生諱世敬生諱脩皆不仕後以子貴贈左贊成司正
公生諱繼宗司圃署別提生諱禹甸忠武衛副司勇
無子以贊成公爲後是生諱履祥文科狀元大司憲
號慕堂文學經術爲 穆陵名臣生諱霁文科禮曹
叅判寔爲府君四世祖也會祖諱柱元尙貞明公主
封永安尉諡曰文懿祖諱萬恢掌隸院判決事考諱
重聖丹陽郡守號芸窩以文章名世妣平山申氏監

司畢之女以 肅廟戊寅二月十七日生府君子漢
京薰陶坊第以今 上丙辰四月十日下午世享年三
十有九以是年六月權厝于東郊牛耳洞丁卯四月
遷葬于忠清道鎮川之文方面虎巖山下丙坐之原
府君娶青松沈氏考曰領議政諱壽賢祖曰應教諱
濡曾祖曰贈左贊成諱若漢妣全義李氏文科直長
諱萬謙之女夫人以丙子五月二十九日生壬辰于
歸以癸丑十二月十日下午世享年三十有八以甲寅
二月權厝于牛耳洞丁卯合窆于鎮川用同壙異室
之制夫人舉二男二女長男良漢文科今弘文館修

撰次挺漢中生員女長適東萊鄭晚淳文科今侍講院文學次適月城金亨大今掌樂院主簿府君再娶坡平尹氏學生諱斗天女舉一男曰鳴漢良漢有一男一女挺漢有一女鄭晚淳有一男二女金亨大有一男一女皆幼府君少有雋才文藝夙就王考判決公甚奇愛之及長器度宏深詞翰兼工大爲先輩所推許咸期以遠大四舉發解輒不利府君愈益自勵不少沮蓋自負有素不以小屈爲意也乙卯冬丁郡守公憂甫葬數月疾作竟不勝喪嗚呼痛哉以府君之才之志年未滿不惑科宦俱未成名無所表見於

世豈非命耶先妣早喪所恃養於繼母安氏安夫人嘗謂小子曰汝母自幼少時柔順和婉未嘗有疾言遽色吾家素貧兒輩不堪饑寒而終無一言及於衣食孝友出於至誠事我無間所生佐我不逮多所裨益余心誠愛重至今不能忘也王考之哭吾先妣文有曰幽閒淑喆之德婉婉和順之容求諸閨秀尠有其匹使汝而男子則非食子豐下之類耶謂必享誥命之尊膺胡考之壽第祿穰穰以昌厥後卽此數語亦可推知德美之萬一矣嗚呼惟我考妣不幸蚤世不肖輩蒙駮無知識平日事行靡所考信而幽宅之

誌不敢久闕只記先系生卒與夫子孫之數納諸墓側使萬世之後咸知吾父母之藏而已至於懿德茂行之不可泯者終不能表章以示後不孝之罪無所逃矣然亦有一二耳目之所覩記者不敢不謹而書之寂寥數行何足以闡揚潛光而後之覽者庶或悲夫吾先人之有志無年吾先妣之有德無祿矣嗚呼痛哉

先府君墓小誌

朝鮮贈吏曹判書洪公鎮輔葬于鎮川虎巖之丙坐貞夫人青松沈氏祔左坡平尹氏祔右考贈吏曹叅

判諱重聖墓在同縣方洞面龜灣里良坐貞夫人平山申氏全州李氏同祔祖考判決事諱萬恢墓在漢城東郊牛耳川燕尾谷庚坐淑夫人南陽洪氏祔左仲子生員挺漢墓在同縣楊花里甲坐鎮川卽三韓萬弩郡也始我王考暨考權葬于東郊會考墓側良浩少日將改葬博求吉地遇一老人朴景三自言其父學風水於華人遍游八路占名穴錄在冊傳至二世爲我指二穴一卽龜灣一卽虎巖遂移奉兩代宅兆於是華人姓名稱羅海天明末辟地東來自號鳳眼居士云

繼妣貞夫人坡平尹氏墓誌

贈吏曹判書洪公諱鎮輔繼配尹氏坡平大姓恭簡公世豪之後學生斗天女也生於 肅宗丙申十九歸我家甫二期而先君子捐世夫人誓心下從以腹有遺胎茹痛強粥飲已而明浩生養與教並摯纔免乳卽令從師遠遊泣而誠之曰人家無父兒驕逸無教尠克立身吾見多矣吾於汝慈愛豈比他兒而苟不能教其可曰有子乎今割情送汝冀望成就不但求益於師友惟兩兄是遵是式或有過失輒痛呵責如嚴父焉良浩兄弟姊妹俱尙幼外無葺功之親惟

夫人單誠撫育無間已出長第嫁娶躬養孫曾以及外孫家素貧荐經喪禍轉徙京鄉拮据綜理日夜勤劬奉祭祀御僮僕有禮有法三世之宗賴而不墜獲有今日皆夫人之功也良浩旣登第庚辰拜慶州府尹推恩先君贈二品官元配沈氏贈貞夫人夫人則親受誥命甲辰良浩陞正卿加贈先君吏曹判書明浩亦早登庠辛卯擢庭試時值良浩按海藩戴花來觀設宴獻壽榮動一路自此涉清顯登緋玉三佩郡綬奉魚軒以致專城養實由平生教誨之力也晚年得風痰疾丁未八月益篤會明浩蒙恩晉秩授漢城

府右尹夫人已言不能遂而諦視金章喜見于色而已嗚呼痛哉夫人德性端潔處心慈惠惇親卹窮如不及無疎戚咸依仰焉以至元配本家視同親家後值傾敗惻然愍念隨事救助發於真誠聞者爲之感歎恒居以未亡人自處雖受兩子榮養而衣服之稍鮮美者未嘗近體輒以分親黨之貧者篋無留儲焉嗚呼此皆求之古先哲媛而無愧者始雖遭罹愍凶而終克備享壽祿人以爲天之報施斯可徵也竟以九月六日棄不肖輩距先君下世五十二年壽七十有二以十一月八日合葬于鎮川虎巖洞丙坐之原

同壙異室祔右而封男長卽良浩仲挺漢生員文而天季卽明浩女二適叅判鄭晚淳府使金亨大良浩二男樂源樂浚二女李肅載李永翼妻庶子樂汶樂濟挺漢無男子樂浚一女佐郎趙雲綱妻明浩一男樂游進士庶女幼鄭子東簡叅奉金子思采源子祖榮浚子幼

內子貞敬夫人東萊鄭氏墓誌銘

并序

貞敬夫人鄭氏東萊大姓中興賢相文翼公光弼之後金川郡守錫者之女母曰楊州趙氏外祖都事明彬也夫人十七歸于我我賦命險薄早失怙恃上奉

王溪集 卷三十一
繼妣克誠克敬恩禮無間和氣融如家貧承三世祀
蘋蘩孔潔烝嘗無缺人稱爲孝婦少居窮約勤苦成
家佐我無屢屨之憂晚受榮祿不變素履使我全羔
羊之節人稱爲令妻育子女慈與義并衣食廛免饑
寒而教誨至於成立人稱爲哲母處妯娌不有物我
庭無間言待媵妾視同私親感服出於至誠下逮家
衆愛戴如父母人服其壺範天姿溫靚謙順精神內
蘊舉止端凝平居罕言笑喜慍不形事有甚憂無戚
戚容人有可怒未嘗大聲以色人服其雅度耿介修
潔絕無嗜好視外物泊如也從余州藩屢享厚祿而

在官無私儲歸家無剩衣服飾菲樸無異寒素人服
其清操性喜施與親戚隣里有急必控有求必應無
一毫見眉睫人服其厚德享年七十有五受封誥至
極品君子偕老子孫滿前爰暨曾孫亦皆英秀人歸
以完福嗚呼夫人德行可謂備矣祿命可謂豐矣浩
然乘化後死者斯可以無憾焉曩余歸自關西猥提
文衡兒子樂浚登第夫人蹙然有懼色曰門戶盈矣
盍歸乎休哉余曰然子誠知吾心矣卽上乞骸之章
優游晚境庶免大戾此尤閨閣之高識余常嘆服者
也老夫平生無偶於世而惟於室家之內有此一樂

王溪集 卷三十一
今焉長已寧不痛哉先述德美納于壻中聊敘結髮之情知心之誼而已夫人生於癸卯十一月二十二日終於丁巳十月二十五日葬於天安郡南日峰山壬坐之岡銘曰

家人有恒婦道乃昌歸妹尚德娣袂之良禮稱如賓冀氏以揚詩咏小星閨化用彰溫粹之容玉如虹光和順之性鳳鳴鏘鏘允矣夫人衆美咸章地秘名山哲媛是藏出日之峰懸燈之岡半坎虛右面勢孔陽月維嘉平日屆勾芒千歲永托卜云其臧靈氣攸鍾山明水長

仲弟成均生員墓誌銘

并序

吾弟不祿已二十有九年矣尙闕誌壙之辭非緩之蓋不忍也余今老矣與君遊者亦漸凋落恐遂泯然無復識者乃飲涕而書于石君諱挺漢字子許吾先君中子也生三歲而先妣下世九歲而先君棄不肖輩于時余年亦十三孑然惇孤無他尊屬惟昆弟相依爲命零丁險釁真所謂鮮民之生也君姿性英秀狀貌豐偉幼而力學有兼人之才甫成童能通二經四書文辭湧發下筆成章屢鳴於庠序年二十登司馬試二十四中增廣解額及會圍大學士南公有容

王澐集 卷三十一
知貢舉見君對策選置高等將圻名傍人言篇末落
謹對字違式當黜南公惜之不能得及見君名一座
大驚嗟惋自是聲聞遠邇皆謂朝夕當騰鶩歲戊寅
余出守江東君從焉未幾余以叅試官赴永清縣忽
聞君病急報亟畢試馳還則已無及矣嗚呼痛哉洛
中士大夫知與不知皆聞而出涕以九月某日返葬
于東郊牛耳洞甲午夏移窆于鎮川楊花里枕甲之
岡距先君墓十餘里君生以辛亥正月二十八日歿
以戊寅八月二十三日寄於世厝二十八稔何其短
也君少負俊才犖犖有奇氣淵弘而有守強敏而好

學孝悌敦信之行急人容物之量皆有過人者士類
翕然重之咸稱遠大之器一朝隕折至謂之關於時
運非余之私言也文詞瞻雅筆翰遒麗駸駸幾於古
而未及底于成惜哉先君諱鎮輔贈吏曹判書先妣
贈貞夫人青松沈氏領議政諱壽賢之女大父諱重
聖郡守贈吏曹叅判號芸窩曾大父諱萬恢掌隸院
判決事高祖諱柱元永安尉號無何堂洪氏貫於安
東之豐山以高麗直學之慶爲上祖至大司憲慕堂
諱履祥而大顯於君爲六世祖也君娶牧使李匡會
女生一男不育一女歸佐郎趙雲綱亦天無後余以

王溪集 卷三十一
次子樂浚爲君後有子幼嗚呼人孰無兄弟而豈有
如君與我之悲苦而成立者乎孰無同氣之憾而豈
有如君之才富器宏而無年又無兒者乎此爲余窮
天之痛而之死後已者銘之所以志哀也銘曰
才固得於天命豈不由於天耶旣豐其才又何薄其
年耶脩短之數不繫愚賢彼司命者胡然而然耶

弟嫂恭人全州李氏墓誌

嗚呼良浩獲戾于天生十歲失慈母十三歲嚴君捐
背吾弟則少我七歲殆不識父母之顏兄弟相依零
丁孤子又無同堂尊屬可仰倚者所謂鮮民之生至

窮無告者也賴天之靈祖先之默佑得以成立危乎
艱哉吾弟受氣不凡有出人之才自在童丱長老期
以遠器李光州丈先友也一見而奇之妻以長女夫
人年十八歸吾家上奉繼姑婉順恭慎與娣姒居和
而有禮一家長少無不稱賢淑吾弟弱冠成進士名
動士友朝夕將大闡戊寅歲從余至江東任所一疾
奄忽嗚呼天平胡寧忍斯時夫人隨大人海州任所
聞凶音星奔數百里哀痛欲絕吾哭謂之曰吾弟賢
而早歿天必不絕其祀吾若有二子當分其一兄弟
之子猶已子也嫂其俟之嫂哭而強應焉後四年吾

次子生夫人抱而養之卽樂浚也夫人初舉一男卽天有一女旣嫁而得奇疾亦未育而短年嗚呼以吾弟之才而無年無祿以夫人之賢而無一血屬以延其後此何理也君子所以致疑於司命者也浚也旣長娶而有室奉養夫人甲寅幸占高科以榮親心又有兩子以悅暮境夫人含飴置膝賴以寬昔日之悲也夫人以 英宗戊申十一月二十三日生戊午臘月之晦終享年七十一葬于鎮川楊花里甲坐之原與吾弟同壙而異室浚也具石請誌塋之辭老夫揮涕而識之夫人宗室德泉君之後也領議政白軒文

忠公諱景奭之五世孫高祖署令贈吏曹叅判諱哲英曾祖進士狀元正郎贈吏曹判書諱羽成祖縣令諱真養考牧使諱匡會亦魁生員負士友之望妣潘南朴氏贈吏曹判書諱弼履之女承旨諱世城之曾孫也吾弟名挺漢豐山世家慕堂文敬公諱履祥之六世孫永安尉文懿公諱柱元之玄孫曾祖判決事贈吏曹叅判諱萬恢祖郡守贈吏曹判書諱重聖考贈左贊成諱鎮輔外祖領議政青松沈公諱壽賢也夫人姿性純粹志操峻潔見人不是若將浼焉人不敢以非禮之容見於前生長法家多識古賢人言行

耳溪集 卷三十一
舉以訓子孫親戚敬憚如嚴師家有大事輒就質焉
恒居以未亡人自處衣服飲食只掩體充飢時果與
宴羞一不近口每值崩城之日前期齋沐徹夜悲慟
鼎俎豆籩必親執曰祭需異於常饈但當質素豐潔
務盡誠敬不可造作奇巧以美觀瞻也與弟大丘君
友愛篤至教導撫卹無異嬰兒家事一皆稟命人無
間言大丘君筮仕得外任以板輿奉往致專城之養
及大丘君歿于官無子弟夫人在京經紀返葬訪族
人之子以立後拮据家產享祀無缺實男子之所難
也宗族莫不感歎與吾夫人爲閨閣中知己妯娌之

間和氣穆如也樂浚娶府使龍仁李章祐女文科正
字女婿豐壤趙雲綱進士縣監不幸短命長孫男錫
榮娶叅判清州韓用鐸女次孫未名樂浚後改義俊
錫榮後改錫謨

三從叔母南原尹氏墓誌

故府使豐山洪公夫人南原尹氏年三十四無祿卽
世公哭之哀曰嗟呼失吾賢師也畏友也吾有四丈
夫兒可以承宗事遂不復娶君子以爲難而於以見
夫人之賢幾於古之淑女好述也夫人監司攀之孫
郡守翼駿之女也端一夙慧孩提時不喜遊嬉六歲

有賣香姬遺一顆於庭小婢拾而獻夫人叱却之亟令追與姬十歲時值國哀冠服縫製甚急手成一衣不煩指授見者莫不驚異十五歸于洪氏儀容靚肅進止有度六親皆賀解婉甫踰月遭尊舅喪哀慟如不欲生執禮無少愆親兄嘗病篤深夜靜室默禱願以身代其孝友出於至性如此連育四子男而每有身飲食必節坐立必端屬屬然謹畏及其乳養不見昵愛之容稍長則隨事教誨有過則呵責不少假義方之訓可比古之女史矣平居罕言笑婢僕有罪當治不加聲氣嘗赴燕席令婢熨新衣火跳而燃婢戰

慄不知所爲夫人取見之辭色不變曰是無情之過勿怕也傍人告以火藝之衣不可近體笑答曰吾若不着彼婢何以舉顏仍服而赴見者咸服其德量口無擇言身無遺行家人無不稱宜細謹疏節不須舉也夫人生於庚寅四月十三日歿於癸亥十二月初八日嗚呼短矣以某月葬於忠州冷谷辰向之原傳曰婦人有四行一曰婦德二曰婦言三曰婦容四曰婦功若夫人可謂兼之矣宜乎夫子之終身不忘而不忍再室也忠正李公彝章夫人表兄也哭以誄之曰秉心皎白平直無一點委曲苟且事舅姑極其誠

王溪集 卷三十一
敬對君子不敢慢易淡於物欲見富貴欲浼李公簡
亢寡許可見斯言可知夫人焉公諱獻輔後三十五
年丁酉以壽終以遺命同穴焉舉四男長冕浩縣監
次彝浩郡守次綱浩端浩諸孫具見公碣不盡錄

宗兄判敦寧公墓誌銘

并序

我東士大夫素重門族非官閥之謂也德厚者族大
名高者門華肆有三韓甲姓之稱而逮國朝尤以是
定其望焉惟我豐山之洪始見於麗季直學士諱之
慶起鄉貢取鼎甲有子諱侃以都僉議舍人文章名
於世號洪崖嗣後兩世以文望入館閣至郎將諱龜

值國革棄官遯跡卜居于高陽戒子孫勿仕歷四世
至慕堂先生諱履祥經術文學爲栗谷李先生所薦
揚官都憲長玉署後贈領議政諡文敬自此門戶大
顯後承蕃昌有孫永安尉諱柱元謙慎砥行大爲士
流所重贈諡文懿於公爲高祖也會祖諱萬容再魁
文科官禮曹判書諡貞簡祖諱重箕進士官僉正考
諱錫輔官吏曹叅判贈左贊成妣贈貞敬夫人漢陽
趙氏承旨儀徵之女公諱象漢字雲章以 肅廟辛
巳六月十四日降聰明英拔文學夙就 英廟丁未
魁進士甲寅筮仕爲金吾郎乙卯登增廣文科以假

注書入侍 上喜曰貞明嫡孫釋褐登筵乎賜祭以榮墳例入槐院丁承重祖母憂服畢被選翰林爲不悅者所敗已未陞兵曹郎移持平正言登瀛錄爲副修撰選知製教輒固辭不出 上荐下嚴教黽勉謝命自此迭出入三司間拜吏曹郎兼校書校理守禦從事籌司郎臺臣李匡誼投啓述辛壬餘論公爲正言游本極言命匡誼烏棘吳光運疏救匡誼語極閃忽公與諸僚上劄嚴斥 上嘗謁 陵臨杖一武臣公言軍門大杖非御前所宜 上嘉納焉壬戌擢拜承旨登夜對 上曰洪氏皆善飲今夜宣醞爲承宣

設也筵臣有言其先臣末疾崇于酒故自此斷飲云矣 上爲之愀然命撤杯盤曰粵昔永安尉蒼顏白髮出入禁掖宮人至今傳說承宣何異於肺腑休戚之臣耶公於是感激有捐軀報國之意甲子 東宮行嘉禮 上與東宮酌獻于 永禧殿召公授 御製詩曰此爲元良作而特付承宣者以其事元良與他人別故也公對曰國祚短長實在於守成之善不善 殿下以此自勉而勉 東宮則誠國家無疆之休矣嘗入對于重書軒 上曰我國之有黨習久矣承宣之族亦有三色目而承宣善處其間云予甚嘉

王澐集 卷三十一
之承宣果能忘色目則予無憂矣公對曰色目異於
黨習黨習可忘而色目則不可去矣今人上殿稱無
黨心而下殿反爲黨習者是欺君也 殿下旣有以
飭臣臣亦有仰勉者用人之道但察其賢否而已
殿下乃較量彼此多少而疑銓官臣願 殿下毋患
色目之不忘而務祛 聖心之疑阻焉大臣薦才識
可大用差備局副提調下大夫而與聞廟謨蓋峻選
也自此數年連居喉院間經大諫戶刑曹叅議拜全
羅監司未赴擢授嘉善大夫吏曹叅判 聖眷日隆
而不悅者愈衆正言趙暉持平申暉投疏誣讟 上

怒責之並削侍從案特除公大諫旋除都承旨公陳
疏引咎請覈人言虛實退處湖舍大臣言不宜置之
暗昧命金吾緘問申暉而秋曹拿問暉所引諸人竟
歸虛罔 上以暉聽浮謗而誣人瞞 上並削黜
公胥命金吾事畢還鄉上疏乞退時方帶關東查正
之任促召尤勤進伏城外待罪命拿推六日乃釋促
令入侍又再違罷職尋敘拜知申陳疏懇辭 特諭
以重書軒之 教不得已謝命 上召見慰諭隆懇
公以恩眷雖摯而義不可恬然供職屢呈告不許會
上違豫就直藥院旣復常陳疏乞護八耄老母 上

王漢集 卷三十一
愍而許之以直宿勞陞嘉義除大司憲歷左尹禮叅
復拜知申時有獎廉褒忠之 教公奏曰忠獻公金
昌集子孫流落鄉曲貧不能祭宜垂矜恤 上許之
移大司成請立泮庠課試相避法士論稱以得體轉
兵叅復授亞銓矢心力辭戊辰清勅來陞秩拜遠接
使仍伴送還拜漢城判尹刑曹判書己巳丁大夫人
憂辛未服除拜都憲判尹除內局提調左叅贊 世
孫有患候直宿及平復以勞進正憲入對 東宮曰
古人云養子方知父母恩 大朝恒以 邸下惟疾
爲憂 邸下亦以憂 世孫之心仰思 大朝之憂

盡慎節之方豈非 睿孝之大者乎壬申除平安監
司謂人曰此乃先人遺惠之地吾懼其或忝也於是
乎守法裕民革弊戢奸勸武士而邊門增重節財用
而府藏充溢疏築城池繕修器械以及樓觀寺刹無
不奐然改觀大臣白洪某久帶籌司嫻於廟務不可
尙處外命內移西民磨崖以頌之甲戌以 親臨試
射三中加崇政階兼判義禁拜兵判乙亥以判義禁
叅 親鞫丙子復主本兵一以搜人才振淹滯爲務
公道大張鞞韋咸悅比之於金清城丁丑連差 貞
聖王后 仁元王后國葬都監敦匠之任節用董事

王溪集 卷三十一
國儲賴焉戊寅以春官奉審 莊陵歸拜左叅贊已
卯復入春官差嘉禮都監堂上禮竣往審北道 陵
寢歸路歷遊楓嶽還朝奏減咸興營府之舊債罷邊
鎮之貢鬃貿蔘金剛僧徒之磁石貢義僧錢獎用北
道之有勞能者東北人莫不感頌轉拜判敦寧工判
乙酉 上親製文致祭永安尉貞明公主又以侍從
臣父受賜米設宴率二子進箋謝恩丁亥 上臨安
國洞舊第記昔興懷特陞崇祿前後兼帶經筵春秋
成均館 世子賓客 世孫師傅副摠管水庫 宗
廟典牲平市署承文司譯掌樂觀象濟用典醫司宰

丙資宣惠廳堂上也己丑 上憫公老病特下手札
許致仕奉朝賀 親臨宣麻使二子替受蓋異恩也
是歲七月二十五日以宿患考終 上下教悼惜親
製文祭之有曰無黨事君卽卿悃悞其心公正尙今
歎服以九月禮葬于長湍功德里壬坐之岡後十四
年以長子樂性拜相恩贈領議政諡靖惠貞敬夫人
前十六年歿初葬豐德佳林洞再遷于柳川至是移
祔焉夫人咸從魚氏 世子贊善有鳳之女舉四男
長樂性領議政樂命吏曹判書樂三樂最俱早歿側
出男樂七女卞廷老僉知金履中妻樂性二男二女

耳溪集 卷三十一
男長義榮生員今叅判大榮進士前副正出後樂最
女長歸郡守鄭致綏次歸金在行樂命繼子世榮二
女歸金鍾杰郡守權禩義榮男耆周大榮男奭周今
檢閱吉周餘幼下廷老一男世義同知五衛將金履
中三男宗喆宗珥宗赫武科察訪鄭致綏男壽翼金
在行繼子履祐進士公天姿豪俊而爽豁外嚴而內
和識量宏深風流弘遠自少有宰輔之望當壬寅誣
獄起先公被逮經年公日夜號泣居必苦藁衣不紵
帛人皆感動奉四世大宗每晨謁祠堂祀享致敬齋
沐滌濯不以老病或懈友於同氣田產俸祿輒皆均

分推及親族周窮急難如不及與人交誠信孚洽年
位旣高而吊死問疾不以疎賤而或遺蓋其篤厚之
性非有勉強也一自釋褐之初恩遇曠絕感戴奮勵
知無不言當事敢爲不擇夷險達於時務周通練熟
事有叢劇談笑揮灑素嚴於下忠邪崇名節其長禮
部也值 聖后復位之年則請致祭吳斗寅朴泰輔
李世華三忠臣暨驪陽府院君審 莊陵則請褒六
臣及嚴興道賜諡金宗瑞皇甫仁鄭萃泛濫羣書博
聞強記才思瞻敏操筆立就至於辨得失析情僞指
劃如流善談論片言決疑一座皆屈每於 上前奏

事敷納明暢 上爲之虛襟傾聽注意大用而忌媚者羣起竟不得展布識者恨之良浩再從祖兄弟也弱少時拜公於床下公撫視無減同氣謂以可教知獎特厚及至通籍公喜而詔曰吾家自慕堂先祖始立門戶以清慎飭躬以公直事君汝尙勉之良也佩服終身得免於大戾皆公賜也竊覲公平生受用不違於此遇知 聖主致位崇顯保族宜家子孫長世無愧祖先之訓而克受神明之佑歷數當世福履之厚莫先於公家暨至冢嗣居元輔享遐耄以余不肖躡其後塵同躋耆英追憶全盛之時未嘗不愴焉永

懷今相君又逝冢孫叅判擎遺狀來徵誌壙之辭遂
投涕而敘之系以銘銘曰

於顯文敬有德有言亦粵文懿執謙蹈仁積慶燾後
子孫振振爰有世胄爲國蓋臣明足以折羣疑誠足
以動 至尊恢乎其容物之量惇乎其收族之恩渥
如其顏擘如其神敷奏欸欸公在 上前周旋暨暨
公立朝端韎韋動色掌我戎權旌旗變彩殿我西門
人方倚以柱石天不假以遐年終有光於先懿遺以
昌乎後昆湍水洋洋祖江同源片石無華百世不磷

禮曹判書致仕奉朝賀洪公墓誌銘

并序

豐山之洪起於麗季以國學直學諱之慶爲上祖是
生都僉議舍人諱侃有文章號洪崖其後兩世爲文
任至即將諱龜見政亂棄官歸高陽戒子孫勿仕數
世隱不官至大司憲諱履祥以德行經術大顯于我
穆陵朝學者稱慕堂先生於公爲高祖也會祖諱霽
南原府使贈議政府左叅贊祖諱柱文禮山縣監贈
戶曹叅判考諱萬紀承政院右副承旨贈吏曹判書
妣原州李氏通德郎說之女 肅廟戊子判書公宰
三陟府以正月二十六日生公于官舍公諱重孝字
聖源生而儁異少孤力學十八中進士三十三魁文

科歷官典籍郎曹春坊玉署乙丑乞養除永同縣監
庚午出爲北道評事丙子洪州有查事遣公按之纔
復命特擢東萊府使斥邪倭免逋銀邊政克修殊俗
皆懾入拜承旨大司諫判決事工曹叅議辛巳除綾
州牧使壬午拜禮曹叅議往董 北陵役晉階嘉善
陞都承旨副摠管同知義禁府是歲 王世孫冊禮
成公副奏請使帶戶曹叅判如燕竣還賞加嘉義丙
戌拜大司憲公素薄宦情解官輒尋鄉未嘗一月淹
也間移工曹叅判左尹丁亥以摠管入衛班 上問
年憫其衰特陞資憲付知中樞尋移工曹判書又授

王溪集 卷三十一
刑曹判書擊斷不饒奸宄屏息不悅者交詆之 上
斥言者公引義還鄉已丑聞候班入城 上召見之
慰留京邸特除禮曹判書呈告乞解自此屢除都憲
刑判或起或不起辛卯九月又拜都憲引疾疏乞休
上以年未至不許尋聞病篤特許宣麻於鄉第手書
御製以寵之壬辰三月十一日終于正寢 上聞之
盡然親撰文以祭以五月葬于原州所草面衣冠村
負癸之原貞夫人清州韓氏直長德師之女生先公
三歲歿後公六日涉獵經史有女士風竟不育取仲
氏同敦寧公第五子秀輔爲嗣文科今判書側室二

子陟輔迪輔二女歸李泰萬李尙殷判書二子仁浩
大司諫義浩承旨陟輔一女迪輔無子李泰萬二子
一女李尙殷一子皆幼良浩宗黨後生也少拜公於
牀下公器宇軒昂內確而外曠居家善事親大夫人
春秋高不樂從宦侍疾嘗糞驗安危旣革斫指以祈
命鄉里感其孝旣立朝當事不避敢言不撓以是窒
於世而獨 聖主優假之每稱其特立不倚官已顯
位益隆公乃逡巡斂挹志在林樊不待年而請老身
名俱完恩遇不替凡今之世係戀榮祿脂韋俯仰者
其視公何如也公少喜文章根據經傳自中軌度尤

長於詩步武中唐風神曄然常以著述自娛山中藜杖逍遙澗臯人不知爲宰相也山居有老栢樹亭亭特秀初自號栢西以見志及出入邇列上每目之曰斯人也疎野純實公退而題其室曰疎窩蓋以榮君言而感知遇也記昔癸未良浩之官龍灣公時自燕歸遇於薩水之上欣然把酒手發奚囊示遼薊詩數篇仍索途中作諷咏獎詡竊有見知之感居然三十年已成陳跡未嘗不愀然永懷今判書公屬以幽堂之誌義不敢辭銘曰

才周而時不遇位高而施未博衆熱如火我介如石君非捨我臣則知足翩然長往樂我林壑丹溪之水可漱可濯琴書在御軒裳不易有子繩武有孫雙壁遺以克昌永垂無斁

三愚堂洪公墓誌銘

并序

我洪氏起於安東之豐山自始祖直學公諱之慶洪崖公諱侃以下三世大揚于麗代逮我朝至諱伊爲南平縣令子諱樹爲成川府使娶于羅州大姓其後落南爲南平人成川公八世孫潤龍以文辭遊京師與余善嘗持其先君遺事示余曰吾今老無成不克顯我家聲願得子銘可以藉手而歸拜先人之墓矣

余感其言而爲之序公諱瑞徵字慶汝曾祖諱民緯生員祖諱宇甲承議郎有三子長曰鍾韻文科弼善仲曰鍾發生員季曰鍾亮通德郎卽公之考也公生於壬辰三月二十日沒於乙巳十一月二十日葬于南平之猫巖公爲人純雅沉靜與人居和氣油然而見人之善若出己振人之窮如不及鄉里稱忠信長者事親盡忠養連喪父母寢苫不釋經六年如一日丘墓去家三十里每月朔望徒步往省與弟瑞範終身湛樂有姜肱大被之風閉門讀書無慕於世名其室曰三愚以終老焉其言曰愚於世之論議也愚於已

之利害也愚於人之長短也斯可以見公之志矣良浩未嘗登公之堂望見公顏色何能窺其德美而今見桐岡李公毅敬贊公之狀曰居家有孝友之實處鄉推敦厚之誼異行懿範足以警末俗而振頽風桐岡南中之賢者也其言可徵於後又何加焉公凡三娶咸豐李氏萬英之女錦城羅氏縑之女昌寧曹氏廷叟之女舉五男二女潤淇李出潤澤羅出潤九潤龍潤泗女鄭五惇林龜夏妻皆曹出潤淇男錫漢楨漢潤澤男泰漢績漢應漢錫四男樂禹樂敘樂禧樂皞楨二男樂雲樂海泰一男樂祐幼者不盡記嗚呼

蕃矣斯可謂根深而枝茂積于躬而贏于後者也銘
曰
顏氏之愚睿而愚甯氏之愚智而愚柳氏之愚才而
愚公之三愚不一其愚無乃隱於愚者歟

耳溪集卷三十三目

墓誌銘

禮曹判書仁陽君李公墓誌銘

御營大將金公墓誌銘

統制使贈兵曹判書金公墓誌銘

司諫院大司諫李公墓誌銘

敦寧府都正李公墓誌銘

侍講院司書李公墓誌銘

同知中樞府事鄭公墓誌銘

同知中樞府事徐公墓誌銘

僉知中樞府事崔公墓誌銘

德山縣監成公墓誌銘

平壤府庶尹鄭公墓誌銘

義禁府都事趙公墓誌銘

金川郡守鄭公墓誌銘

義禁府都事鄭君墓誌銘

成均生員李公墓誌銘

成均生員李公墓誌銘

淑夫人密陽朴氏墓誌銘

孺人青松沈氏墓誌銘

耳溪集卷三十三

墓誌銘

禮曹判書仁陽君李公墓誌銘 并序

仁陽君李公既沒之明年其孤在協以狀屬良浩泣
言曰吾先子享高年輩行凋落已盡知先子本末者
莫如子敢以壙誌累子良浩敬對曰噫宜子之有是
言也不佞於先大夫有三代之好竊嘗受公知而慕
公義敢以無文辭謹稽龍仁之李為東方大姓以高
麗太師三重大匡壁上功臣吉卷為上祖在我朝有
士涓官開城留後伯持官江原觀察使選廉謹吏父

子並顯傳九世至大司諫士慶生叅議後天贈贊成
後淵叅議生牧使挺岳爲後於贊成以仲子左議政
世白貴三世追爵長子曰 健元陵叅奉贈吏曹判
書諱世膺卽公會祖也祖諱宜振甌山縣令贈左贊
成仁原君考諱普赫 英廟戊申討嶺賊策輸忠竭
誠揚武功臣仁平君官至判敦寧府事贈大匡輔國
崇祿大夫議政府左議政府院君諡忠貞妣貞敬夫
人南陽洪氏贈持平胄華女公忠貞公長子也生於
肅廟乙酉十月九日幼而嶷然不與凡兒等及長委
禽於霞谷鄭先生之門先生甚重之得聞士君子行

已大方甫踰弱冠亂起嶺南當是時忠貞公以右防
將守星州賊盛路塞中外洵懼公自京師遣人踰嶺
得發兵狀及賊虛實聞于朝遂馳謁于兵間雍容不
亂人以是知爲遠器早治舉子業所與遊皆知名士
相繼取科第公獨後世皆遲之有一知貢舉欲物色
之公覺之謝不肯聞者賢之乙卯選增廣生員補義
禁府都事換內侍敎官陞郎署除砥平縣監邑小歲
饑公簡徭寬賦流亡復集入爲諸寺曹郎出爲平澤
溫陽或拜或病免朴靈城文秀判地部承命修度支
定例辟公爲郎講成畫一之條已巳拜潭陽府使州

多逋穀公悉摘豪猾係孥責負倉實以完監司善其
法頒之列郡數年出牧忠州忠大州也居半歲不擾
而辦癸酉春中庭試乙科以科前準階陞通政授掌
隸院判決事旋移承政院同副承旨自是屢以特授
至左承旨間爲兵曹叅知叅議刑曹叅議丙子丁母
夫人憂旣吉又入政院兵曹轉大司諫公以衰晚通
籍不欲居言議地暫肅而遞庚辰 上謂宰執曰李
某悃悃無華達於事務予欲效褒德侯故事以鎮躁
競遂擢漢城府右尹公榮君言扁其室曰無華兼五
衛副摠管承文院提調移工曹叅判尋爲都承旨應

製居首賜文皮連拜戶兵曹叅判同知義禁府事遷
大司憲公旣引前義又以在協帶館職父子不宜並
處三司終不出改禮曹叅判壬午忠貞公歿服除付
同知敦寧府事襲封號仁陽君差勲府有司堂上領
議政洪鳳漢爲言公才宜試方岳遂拜京畿監司時
畿內荐饑公調賑有方民以無瘠乃言于朝曰畿輔
國之根本巡察使開府於城外雖不宜握重兵亦不
可手下無兵以衛輦轂建請牙兵之在邑鎮者編成
隊伍無事則在野有事則調赴畧如府兵之制明年
內移都承旨丙戌以藥院勞加嘉義兼同知春秋館

事掌苑提調丁亥春戶曹判書缺領相徐志修曰李
某可 上領之而未及用後金致仁代相復薦公遂
擢授漢城判尹兼知義禁府差備邊司堂上尋移禮
曹判書兼內局提調冬特授兵曹判書力辭不獲公
既居本兵慨然以張公道振伏滯爲任開閣接武士
終日無倦色還鄉積屈之徒聞風四至懷刺再及門
者輒爲誦官歷名氏無錯毋論得不得皆驩然滿望
經大政引疾明年夏罷去敘拜禮曹兼同知經筵事
已而兵書又闕 上以大政宜付熟手復授公 親
臨視政畢面諭許解曰今可遂卿志矣移京兆秋拜

戶書 上曰大臣嘗舉卿今得人矣冬關西缺監司
廟議屬公 上以方掌賦難之僉曰國之西門宜用
重臣鎮之遂遣公前方伯鄭杲築平壤中城未幾而
遞朝議皆謂功費鉅不必繼之公曰人始而我輟是
惜財也遂捐俸完役推餘財置庫以備修繕明年內
移兵書改禮曹兼司僕司譯提調知經筵春秋庚寅
又拜兵書既行大政固辭踰年而免敘拜禮曹移議
政府左叅贊嘗帶備局司饗惠民提調壬辰復拜本
兵轉政府春官癸巳夏特除守禦使擢判義禁府事
時王城川渠堙闕設濬川司歲用民疏滌勞費不可

耳溪集 卷三十三
當公任其事白 上曰防川不用石非久道也請分
屬諸軍門限界課築則不四五年功可就費可省矣
上善之至是石築成錫馬以獎之公明年滿七十推
子侍從恩歲末例加崇祿階至春入耆社乃上疏陳
情曰犬馬之齒正臻懸車軍旅之事自當釋也今臣
所望非敢效他人引年乞身唯願盡免所帶諸任不
復縻以職事使得優游勲祿 上覽之曰昔呂尚八
十鷹揚故相李元翼杖於政事堂今仁陽豈特少於
予比古人猶減十年乃遽乞閒耶命還其章公惶恐
不敢復辭乙未諸臣進饌於 上公以耆社入侍特

加一資進輔國崇祿階例付知中樞丙申春始解守
禦使三月 英宗大王升遐今 上卽位謁新 陵
命公爲守宮大將 駕還面乞解備局不許尋以他
事坐罷後在協侍經筵 上召使前問公安否曰自
去備局久不見面予庸悵然筵臣皆爲動色丁酉冬
公適入侍特授宗伯曰見卿步趨尙健毋辭也公感
激承命明年大行三年畢 真宗又追崇並祔 太
廟儀文大且繁 上親行大享公以禮儀使導前進
退折旋咸中禮式至卒事無愆儀無惰容觀者異之
時 王大妃以 上未有儲嗣降內旨擇嬪御元嬪

王溪集 卷三十三
洪氏以十三歲當膺選嬪兄國榮居宿衛用事公職掌嘉禮進曰今日事惟求嗣是急年弱不宜與選言雖不用人以為得體禮成即引疾遞已亥六月感暑微憊醫言當用補劑公笑曰吾年高位亢理當歸盡何藥為家人憫之潛煎人蔘托言茶飲以進公強呷不肯竟器前一夕呼寫答人書數番各致不復相見之意使傍人為剪爪理髮更正枕席而終時七月三日也停朝市祭賻如例以九月十五日葬于加平南逸村面乙之原從先兆也公諱景祐字孝錫初諱景祚登第後有宗人罪死請於朝改之公性寬弘坦易

內確而外敏聰悟絕人前代故實靡不淹貫為文辭操筆疾書條暢可觀與人接誠溢於色無疎戚賢愚皆得其歡心尤篤於內行忠貞公晚節癘病公年已六十矣左右服勤未嘗少離兄弟無異藏常俸例饋悉與分之兩妹嫠居時輒並子女迎來設食以盡歡與弟判書公分日為會竟夕怡愉常曰吾今無求於世如是送餘年足矣每公退蕭然清坐蒔花養鶴以自娛跡不及朝貴門手自題壁曰仕宦以孤寒為安身處世以恬澹為立命居處服食朴素如布衣其自澗上歸也任事者進羨餘簿甚夥公熟視無一言索

耳溪集 卷三十三
紙作帖子盡散之營屬及貧親故關西素稱雄腴田
僮無所增屢典西銓干托不行有一武人久屈當調
而孤寡無援公意欲收之而未嘗假以色辭其人自
以爲不得及政首舉之人皆翕然稱公贈貞敬夫人
鄭氏延日人圃隱先生之後左議政維城玄孫祖曰
贊成齊斗卽霞谷先生也父府使厚一外祖靜觀齋
李公端相也胚胎名家柔和端一及歸于公承事有
禮先公三十三年卒妯娌娣姒至今誦慕不已公歿
一年遷其墓合封焉始夫人之歸公實在庚子暮春
而及其同穴甲子一周月又如之噫亦異矣舉一男

卽在協擢魁科已至亞卿四女適縣令曹允先判官
趙台鉉校理尹東晚士人徐有應側出二男在寧一
幼在協一男來鉉四女進士鄭東教士人金思植成
載厚尹謙基其婿也曹三男世振善振憲振一女李
元杓妻趙一男濟魯進士二女金啓洛李永錫妻也
良浩少也拜公於鄉黨見公居家孝友任卹出於天
性急人困如不及旣登朝從公之後出入前席又見
公言事對命一於誠慤絕無俯仰矯飾之意私竊懣
然心服而至若澹乎其處世休乎其容物使人近不
可狎而遠不可忘蓋古所稱篤厚長者可以敦薄夫

而鎮雅俗者也方公之喪卿大夫嘆於朝吏隸吊於路曰賢宰相亡矣是豈聲音笑貌之所可得哉嗚呼可銘也已銘曰

秩視公孤榮已極兮齒至耆者年不薄兮惟敦與直邦之碩兮有猷有惠民所式兮乃如之人今安覲兮千歲之後留此石兮

御營大將金公墓誌銘

并序

公諱應海字君瑞姓金氏遼東伯忠武公應河之弟也萬曆己未明師大衄于深河忠武公力戰死之彰大義於天下公當丙子難守正方城孤軍無繼爲敵

所乘自刎不殊生死雖異均之爲尊 王殉國人比之顏平原兄弟金出安東高麗名將方慶之後曾祖諱麟祥成均直講祖諱韜兵曹正郎考諱地四贈叅判娶虞侯金忠老之女以萬曆戊子生公早喪親與兄相依丙辰登武科拜宣傳官轉都摠都事出爲熙川郡守先是忠武公以宣川助防將領兵赴深河公慷慨請從忠武止之曰兄弟俱死無益也及深河敗公痛恨日夜腐心庚申陞通政拜江界府使朝廷以其兄故用之以不次也甲子擢嘉善歷守富寧仁同定州皆以廉潔稱丙子以元帥薦爲別將守正方山

城十二月敵兵直走漢京公帥輕騎三百截大路與戰數十合勝負相當公馬中箭而蹶徒步倚洞仙巖彎弓而立射殺三人敵來益滋圍之數重公自度不能脫大呼曰深河之戰立柳下張目執弓死者乃吾兄也今吾力盡不能殲汝何面目生報吾君何面目死見吾兄也遂拔劍橫突敵陣所擊殺甚衆仍自剄敵謂公死乃退褊裨尋公於亂屍中怒目猶不瞑氣勃勃然擔入城用萬金良藥以救之甲中九箭幾洞胷公既甦而兵解丁丑八月除副摠管授慶尙左水使尋遷右兵使辛巳擢捕盜大將又出爲黃海兵使

移平安兵使裝送天朝通使之船爲賊臣李炷所訐與前監司鄭太和被逮至鳳城禍將不測公從鄭公抗辭不屈事得已甲申拜慶尙右兵使明年陞統制使又明年入拜御營大將移摠戎使辛卯自點獄起公名出賊口遂被逮 上曰應海忠節不減乃兄豈從賊叛耶特釋之卽拜北兵使介胄之士咸感聳後又拜摠戎使出爲春川府使旣歸歎曰吾年踰七十官尊祿厚於分已足今國家少安可以告休遂上章乞骸 上不許乃請省墓歸鐵原杜門謝客優遊數年丙午二月十五日無疾而終葬于先塋側負良之

原夫人東州崔氏將仕郎洛厚女舉一男克鍊早卒
贈叅判一女歸進士沈鍊側室男碩鍊女長適進士
鄭就祥次適察訪李守敏克鍊男世章贈判書世彥
贈叅判世翊摠戎使世章男長重九兵使有子浚叅
奉洸統制使次重呂兵使有子潤統制使世彥男長
重元統制使有子洞早天濩統制使次重三兵使繼
子淑府使摠戎男長重徵府使有子滄御營大將次
重一判官有子浣防禦使余觀公初則戕身而志於
殉國忠也終則辭官而全其晚節勇也忠且勇不愧
爲忠武之弟矣是宜銘銘曰

深河之柳有虹薄日洞仙之石有劍飛血一死一生
二難雙節 王懋厥忠屢秉戎鉞國有干城皤皤白
髮尺疏歸田我志莫奪冥鴻增逝高風遐揭後孫繩
武山西世出鐵岡嶄巖言埋其骨石有時剝名不可
滅

統制使贈兵曹判書金公墓誌銘

并序

東國有將族曰安東之金金出新羅爲國姓羅訖而
麗興有曰方慶勦勅寇立大功封上洛公遂籍安東
爲望姓及我 英陵蒐羣才有曰大來以經行進爲
宗人師與成朴諸學士善其後連三世以文科顯有

曰應河爲皇明死深河名震華夷 天子詔贈遼東伯其季曰應海官 三朝爲御將力戰於洞仙之役稱忠勇名臣卽公會王父也祖克鍊考世彥皆短年先御將卒並贈亞卿妣晉州姜氏清白吏說之女以仁祖癸巳生公公諱重元字善卿幼而碩御將公奇之曰是必大吾家公蚤孤能自奮通儒業善草隸自以將家子就武舉年二十四登科初除武臣兼宣傳官選入籌司郎應對題判稱宰相意遂以知名甲子南土饑有虛警 上命簡邊吏授公加里浦僉使入拜都摠府經歷復出爲慶尙右兵虞侯尋陞訓鍊院

正丁卯進通政階領禁旅時關北新置茂山府朝廷擇其守命公勅施張畫皆中條爲後式官滿以軍門召以武臣登講筵陳茂山邊邑當敵衝不可無城上用其言遂築茂山城自是官益顯內則由宣傳官訓練都正至副摠管軍門則歷禁衛御營訓局千摠別將中軍至禁軍別將外則寧邊吉州春川谷山會寧府使戎閫則慶尙左水使黃海全羅關北兵使至三道統制使皆稱職有名績其在嶺閩丁大饑响哺勞來民以不瘠有盜官器者執而訊泣曰飢寒於迫至此公矜其言喻以理賜衣糧遣之盜卒爲良民在

吉州也歲又饑賑之如嶺會公病民爲禱於山三日
云會寧例互清人市舊多誘騙起爭公接以廉信清
差服公義贈公良馬却不受及爲統制以公會大父
季父舊莅尤單心爲政思胤前美繕戎械蘇軍察又
設解懸倉以寬漁戶軍民爲伐石頌焉歲丙申某月
日終于京第祭賻如禮葬于鐵原漁隱洞負西之岡
後以子原從勲贈兵曹判書夫人平壤趙氏父曰統
禦使猷爲婦爲母以順以嚴後公歿從公祔有男二
人長洞早卒無嗣次濩亦以武著繼踐統制三女適
李萬恒鄭壽樞沈鈺側出男汲女長爲兵使元百揆

妾次爲主簿李真實妻統制一男柱瑞後改昌遇武
科寧遠郡守早卒官不長庶女尹暎趙載則妻也李
繼子之昶鄭繼子瀕沈子亨之女婿趙德洵寧遠男
魯範女嫁訓練正李格公外庸旣茂內行又備與弟
節度公居連開服食鞍馬與共節度嘗在沁中病甚
公馳往省之乘暮出城夜漆黑不辨路忽有火光前
引至村底始滅觀者異之內舅老而窮每赴官輒奉
往以事母者事之是尤人人所難也觀乎二事斯可
知其事親矣魯範年少業儒述公狀來乞銘余觀公
爲官勤而惠居家孝且敦是宜銘遂不辭而銘之曰

林以鷄鳴厥聲嗶嗶三姓迭王金祚獨長國遷而徵
上洛雄驤錫邑建族胄出益昌或經或藝廼冠廼纓
嶷嶷遼伯有弟難兄河衄岳膊生死皆榮厥曾何肖
將門又生五握戎鉞爲干爲城居躬以約御物以誠
氓有山禱鬼引宵征歸餘于後世有嗣聲鐵山有穴
維金之藏其石不磷鑽我銘章

司諫院大司諫李公墓誌銘

并序

曩歲癸酉余在翰苑李聖尹以新榜入堂后年甫踰
弱冠儀狀昂然精彩逼人及與之登筵周旋警敏下
筆如飛余從傍窺之左手執冊右手操管方濶數寸

許紙細書六七十行點畫如蛾子蛛絲驟不可辨退
而讀之綴事纂言井井有條無巨細漏不覺瞠然異
之遂與定交聖尹亦喜與余遊或從余郊居相得驩
甚余拙於處世交遊益落而聖尹獨不替終始蓋二
十年如一日庶幾乎古之友道而今也亡矣余之悲
也豈獨其才與志之惜乎聖尹諱昌任系出宗姓
世宗王子寧海君諱瑋爲始封之祖其後有江寧副
正諱祺以己卯名賢聞於世六傳而兵曹佐郎諱廷
麟大司諫諱彥經刑曹判書諱春躋爲三世祖考也
妣豐壤趙氏判敦寧諱遠命之女聖尹以庚戌十月

王澤集 卷三十三
十三日生聰秀異凡讀書數過輒成誦判書公奇之
命治明經業年二十四中大比科與余及今冢宰鄭
公尚淳同居左右史以特恩陞六品踐吏兵郎歷臺
省有敢言風在春坊最久以箴規自任欵欵盡誠裨
益甚多 小朝亦敬憚視以心腹每事必諮由是知
名辛巳選瀛館丁父憂未登都堂圈繼遭母夫人喪
服纔吉 上臨筵稱曰某也真學士特授館職每橫
經侍講讀聲清亮敷奏明鬯 聖主爲之動容聽焉
時賜對便殿命讀子史諸書無不融貫傍人皆驚曰
是年少以明經進何博通諸家乃爾云壬辰承命按

西帥虧兵餉得實歸奏與大臣金致仁爭於 上前
抗下無一毫摧挫 上深是之旋命監印明史用勞
陞通政階入銀臺累遷至右承旨叅知騎省遂長薇
垣間出外爲海西之康翎湖南之靈光皆不久而去
甲午除安州牧翌年夏以病歸數月遂不起得年塵
四十六竟未及大試嗚呼惜哉聖尹初娶南陽洪氏
唐原尉右敬玄孫廷喆女育二女再娶海平尹氏左
贊成承吉後孫澤顯女不字取第三兄應教學士聖
庸之子爲後名宣鼎二女歸成鼎柱宋日載聖尹爲
人疎儻狷介果敢有膽氣邁往無前善料事每與徐

耳溪集 卷三十三
繼仲李善之趙元玉具伯殷諸公論朝廷得失世道
升降往往中機凡有疑難輒單辭劈之中易直不設
尺幅見人不是不肯苟合人故多不悅者然與人交
善不以寒炎有移士流以是多之及其歿也善之元
玉益慟悼曰吾黨無人矣先公性嚴色有不怡諸子
不敢近惟聖尹從容善諍多晨昏之助太夫人老寢
疾溫涼甘毳能適其意衆兄弟居一巷饑飽與同官
廩有贏悉以分之洪夫人明惠有婦行生於戊申歿
於丙子墓於龍仁魚藏浦坐艮之阡家人從遺意將
合葬聖庸亦與余善期詡甚摯泣謂余曰吾弟嘗重

子言得子言銘吾弟可無憾矣余曰噫聖尹之重我
非私我也以吾不妄許人也非吾銘之誰當銘吾友
者然聖尹少於余而使余銘是尤可悲也銘曰
英妙奮翥人之傑兮搏不盡翮誰之遏兮珥玉垂緋
亦云達兮無年與子又何闕兮克順克信倫無缺兮
有慧有決氣難奪兮高山有封掩其骨兮骨則掩矣
神不滅兮

敦寧府都正李公墓誌銘

并序

公諱堂字士肯系出璿派 中宗大王第五男諱岐
封德陽君以別子立宗是爲公四代祖也會祖豐山

王溪集 卷三十三
君諱宗麟祖龜川君諡忠肅諱晬抗節昏朝載國乘
考蓬山君諱炯信以清慎厚德稱宗英妣郡夫人清
州韓氏判官得一之女以 顯宗庚寅生公兄弟六
人序居第五幼而端敏好讀書才學出儕流嘗手書
庸學潛心玩繹平生受用蓋本於此戊申丁內艱過
毀幾廢明公曰此非藥可治乃爲暗室闔眼靜坐日
誦庸學章句近一年視物遂如常癸丑與第四兄叅
判公同中司馬時蓬山公尙康寧第三兄判書公已
釋褐世以爲榮公優於翰墨名聞士友嘗赴謁聖試
考官得公卷欲置之魁判書公適叅考知公文體挽

之以遠嫌壬戌丁外艱旣闋寓居于南陽以書史自
娛己巳拜 貞陵叅奉遷司饗奉事宗簿直長甲戌
例陞歸厚別提移禁府都事掌樂主簿刑曹佐郎陞
正郎乙亥除泰仁縣監會歲大無割廩哺饑月三試
士析儲爲賞士民咸頌方伯上其最命陞敘己卯除
錦山郡守辛巳遞癸未拜禮賓別提遷戶曹正郎甲
申除利川府使剔吏奸刷民瘼邑人立石頌其惠己
丑移延安府使大修軍械蒙錫馬之賞越三年判書
公罹文網公上京求遞檢田都事抉田災劾罷公怡
然笑曰求遞得遞安用辨爲後地部追覈之辨其爽

王溪集 卷三十三
實乙未拜衛率陞翊衛己亥兼訓局郎是歲 肅廟
入耆社凡朝紳年七十秩四品者皆陞資公與焉拜
僉知中樞府事庚子拜五衛將辛丑拜敦寧都正尋
遞其後連拜僉知曹司衛將皆不就戊申十二月二
十八日終于正寢始葬于南陽府東後遷于同面百
老洞某坐之岡公天姿清雅風儀端重篤於孝友嘗
以祿不逮養爲至恨每出宰請于宗家奉先廟以往
諸兄弟共一閑步履相隨酒肴團歡壬辰公在延安
也叅判公守松京季氏都正公莅黃州及其第二兄
僉樞公生朝咸集于京分日設席五公鬚眉俱白簪

組交映互舉壽觴親賓胥侑命曰連枝會繪畫成卷
一代名碩聯詩弁序以賁治代盛事其在外官族人
告婚喪無疎戚應之無倦色四典州郡公廉爲治歸
裝蕭然世稱循良必先推公趙相國相愚金相國宇
杭嘗歎曰如某之才學終不能貯之金華惜哉其見
重於當世如此前夫人韓山李氏縣監稹之女入門
僅數月而卒葬于廣州彥州里本宗先塋下負西之
原後夫人光州金氏重亨之女柔順勤儉婦德咸備
生於甲午歿于壬子祔公墓左舉一男箕彥司書三
女長適生員崔昌瑞次適權磐次適鄭善一側室女

適沈墀司書三男長著敬生員次著誠天次著贊進士二女長適俞彥百次適縣監尹映崔昌瑞三男長守正次守謙蔭同樞次守儉權磐無后鄭善一繼子志學著敬三男長遇濟今校理次榮濟為仲父後次升濟為季父後二女適正字沈樂亨生員趙琦采遇濟二男長東萬今正言次東九為榮濟後二女適生員朴弘源曹玄振升濟男東順銘曰

靖陵靈支國之維城三世清謹蔚為宗英暨六兄弟大振家聲公起門蔭處官廉明棣萼連巷杯觴簪纓寬樂壽考豈其公卿敦親濟急遺後必贏子及曾玄

相繼策名百老之岡四尺其塋惟質無華不媿我銘

侍講院司書李公墓誌銘 并序

公宗姓諱箕彥字君美德陽君岐以 中宗第五子為始封之君有子宗麟世襲為豐山君是為公高祖也會祖龜川君諱晬抗節昏朝贈諡忠肅祖蓬山君諱炯信考敦寧都正諱堂妣曰淑夫人光州金氏重亨之女公生於 肅宗丁丑聰悟異凡七歲都正公指屏間畫烏命賦詩公即口對曰昔聞楚阜有一鳥三年不飛亦不鳴今見屏間有一鳥十年不飛亦不鳴都正公甚奇之仲父文泉公嘗曰昌我門者必此

王澐集 卷三十三
兒也十六歲發解漢城試大比及泮試連捷解額丁未中司馬戊申除 順陵叅奉蓋是歲春魁別試初試屈於殿試公議惜之銓曹有此舉擬也冬遭都正公喪捲歸楸山壬子又遭內艱丁巳拜 泰陵叅奉戊午遷 明陵奉事庚申遷 靖陵直長是歲秋擢增廣及第以注書入侍以公家南小門下 上詢舊門廢塞之由仍問興仁門扁獨加之字何也諸臣莫能對公前奏曰東城外水口虛濶故取山家之玄之義以防之云 上領之辛酉夏拜侍講院說書纔數日特除掌令大臣以違政格劄請還收 上答曰欲

以名流爲掌憲矣今雖置之幾何不爲正言乎姑仍本職未幾拜正言旋爲持平公正色立朝獨持風裁前後六啓皆允納褒之曰寥寥之時能舉職矣公感激恩言遂疏陳科弊田政軍政籍法等諸條而救弊之策皆得其要 上優批開納庭試設初試良役減一疋皆自此始是歲冬拜司書時赴燕使得孔聖事蹟圖以歸公達于書筵撰一本以進仍上章勉 睿學壬戌拜兵曹正郎時有嶺南量田事擇差爲慶尙都事辭不赴其後因良役查正大臣啓請差備局郎付實職除工曹正郎事訖拜務安縣監未赴任而疾

耳溪集 卷三十三
作以癸亥二月二十八日終于寓所壽僅四十七權
厝于東郊牛耳村淑媛墓下丙寅春移窆于局內負
庚之原公姿性溫雅志操高潔望之知爲愷悌君子
清晨必盥櫛衣冠對書卷若逢會心之友探討古文
唱酬詩律口不言人物臧否時議得失公於父母晚
生也及長二親皆向老扶護保養敬謹靡懈所以先
意而養志者多人所難及處孤露以後奉養姊氏如
事親衣食必先宗族無遠近誠心收恤曰先人令德
余不敢墜平生自奉甚薄饑渴寒暑處之晏如及疾
革戒家人歛葬之具務從簡儉巨細不遺翛然而化

元配淑人豐壤趙氏判官命禎之女副提學持謙之
孫生長法家婦道甚備嘗言婦人不幸當難避走妄
也及戊申逾變都下鼎沸潛懷小刃於衣袖蓋擬倉
卒決意自裁也生於丙子卒於壬子始葬於南陽丙
寅春移祔公左後配桂林金氏彥豪之女生於癸巳
卒於壬寅別葬於南陽府東柳池向壬之原趙夫人
二男長著敬生員次著誠二女長適俞彥百次適縣
監尹映金夫人一男著贊進士著敬三男長遇濟今
校理次榮濟次升濟二女適正字沈樂亨生員趙琦
采俞彥百二男漢蒼漢玄尹映繼子行果遇濟二男

長東萬今正言次東九為榮濟後二女適生員朴弘源曹玄振升濟男東順銘曰
才而揚需于王國年何短飛不盡翮風聲諤諤臺端式一封昌言衆弊革豐而奪司命之抑積必報後昆之食

同知中樞府事鄭公墓誌銘 并序

公諱錫百字朋之姓鄭氏遠祖在高麗時為東萊戶長以恭儉喜施與稱長者其後遂大昌為東方甲族人以為積善之報入我朝有若翼惠公蘭宗佐 成宗策名旂常有若文翼公光弼相 中宗救士禍名

德載太史有若林塘公惟吉水竹公昌衍父子繼相以文章雅望名世子司寇公廣成以袁楊之世脫屣榮利君子稱其大勇寔生翼憲公太和相 三朝秉勻軸有大勲勞於國家實公會大父也大父諱載岱工曹叅議考諱赫先通政牧使贈左贊成妣贈貞敬夫人延安李氏縣令贈吏曹叅判泳女領議政時白玄孫生三男長曰錫三都承旨仲曰錫五左議政公其季也公以 肅宗己卯正月二十一日生 英宗丙辰蔭補 寧陵郎陞廣興奉事戊午中司馬轉尙衣院禮賓寺直長遷司宰監主簿刑曹佐郎正郎壬

王溪集 卷三十三
戊除平康縣監甲子陞載寧郡守三載解歸是後歲
有除入爲司饗主簿漢城庶尹北部都事掌隸司議
宗親典簿掌苑別提儀賓都事司饗僉正出爲大興
郡守咸興判官殷栗縣監此其內外官歷也歲戊子
公壽滿七十以子晚淳侍從恩進階通政爲僉知中
樞間爲五衛將癸巳擢嘉善以特旨授同知中樞甲
午進嘉義以辛丑九月十七日考終享年八十三是
年十一月初六日葬于西原池谷里負坤之原配貞
夫人全州柳氏承旨泰明女生後公二年歿先公四
年始權窆于龍仁乙巳四月某日合祔于公墓舉四

男二女長晚淳文科大司憲次宜淳蔭叅奉次華淳
生員今府使次文淳早歿女適縣監洪冕浩郡守洪
載淵俱無子庶子三涑監牧官滄漵庶女三李英圭
趙喆李儒觀妻晚淳娶良浩先君贈吏曹判書洪鎮
輔女一男東簡二女婿曰朴獻源李澈宜淳娶縣監
李普運女二男東藝東采二女婿曰李在安安錫良
庶女二洪秉喆韓光淵妻華淳娶左議政李思觀女
無子以族子東萬爲後文淳娶大司憲李彝章女亦
無子子東采涑子相裕漵子後裕良浩以通家子事
公於鄉閭竊覲公性質寬厚器度通儻其接人也裏

王溪集 卷三十三
襍坦坦和氣溢於言面人無親疎貴賤一以誠慤待之口未嘗言人短長急人之困如飢渴不計有亡故屢典州郡家常空匱終不以屑意雅喜林園無官則輒疋馬出郊種樹課耕曳杖消搖混跡於山翁野叟人不知爲官人也尤篤於孝友遇先忌旣耄必澡躬茹素與仲氏議政公居異術非在公則日常造湛樂永夕姊妹之貧者與分衣食視諸甥如子親戚咸倚以爲歸焉夫人亦有懿行善事舅姑贊成公嘗住鄉舍夫人竭誠致養至於親操井臼手拈園蔬以供之贊成公每謂李夫人曰吾婦孝敬如此吾菜食甘於

芻豢矣治家有法度妾媵無間言終暨公享大年受榮誥婚歲再屆爲設重脔之筵袍笏捧觴兒孫滿前一世莫不艷慕此豈無所致而然哉不佞嘗論鄭氏之先以篤厚立心以勤儉成家以謙冲處世故官尊而名不虧門盛而人不競用能保族宜家子孫長世如公可謂能世其家而食其厚報者也是宜銘以詔後生銘曰
質而不矯沾沾者之愧也敦而能施齷齷者之畏也旣壽旣福以昌其後嗣

同知中樞府事徐公墓誌銘

并序

王澤集 卷三十三
公諱海朝字宗之九九齋其號也連山之徐譜遠而逸以成均生員寶爲鼻祖值麗運將訖遜于湖之結城子孫仍居焉有曰宗秀定山縣監有曰憐濟州判官斬妖蟒革民害州人建祠以祭有曰千齡燕歧縣監至諱澍監察贈兵曹叅判是爲公高祖曾祖諱效積贈司僕正祖諱必行贈左承旨考諱楳贈戶曹叅判皆以公貴也妣蔚山朴氏贈貞夫人縣監縞之女以 肅廟辛未生公自幼聰明沉重文藝早成甲午中司馬壬子七日製與進士李鳳齡同坐對策會風雨日薄暮誤書而折卷乃以草藁授李曰君須以此

寫呈及榜出公名居魁蓋兩卷初已誤換故也公驚曰士之出身義不可苟卽呈禮部願拔名李君挽之不得亦呈單曰文旣某文卷亦其卷生則書之而已此乃天也願亟賜徐某科太學生四十餘人亦聯章而請之禮曹以聞 上教曰徐某此事人所難能拔雖可惜宜遂其志於是一世躋之國子長徐公宗玉奏于 上曰臣素聞徐某之文詞淹博志操耿介今觀辭科一事實非俗儒之所及 上深加嘉尙是年冬除 厚陵叅奉癸丑移 慶基殿乙卯復換 章陵是夏擢增廣丙科丁巳拜自如察訪新經大歎郵

卒流亡公殫心勞來已未遭外艱哀毀踰禮一鄉稱
之服闋除 穆陵別檢壬戌陞典籍時國有賀儀而
雨不克參者多 上命各自首實人多惶懼不以實
公獨曰人臣何可欺君乎遂自首坐罷乙丑敘拜禮
郎又移兵曹尋遷正郎以問事郎叅鞫獄丙寅拜延
豐縣監邑是孔道使蓋相望公節用省費量入爲出
時當通信之行不煩民而接應無闕邑有積逋公曰
不矯此弊民不支矣乃據實查報投印而歸延人至
今賴之辛未拜司憲府持平移吏曹佐郎癸酉掌試
于海西塞私徑張公道乙亥試士于湖南亦如之兩

路多士交口稱道自是政望雖低擬輒下點曰此辭
科徐某乎癸未以壽陞通政階拜兵曹叅議庚寅十
月又陞同中樞是年十一月患微恙及革扶起盥漱
飲酒移席東首而臥翛然而逝享年八十翌年春葬
于先塋左岡亥坐之原公篤於孝友敦於族黨有姪
五六人率養一室皆至成就氣宇清臞神彩明粹平
居不見惰慢之容諧謔之談操履篤而執守確釋褐
三十餘年安分守靜未嘗一造權門爲文章以理勝
辭達爲主不尙新奇每朝擁衾誦學庸章句至老不
廢易數閏法多有悟解又好杜陵左氏有杜詩補註

左史抄類嘗曰先王制禮時祭爲重墓祭非古也宗廟只奉二昭二穆則臣子之祭四代僭也乃以重時享祧三代之意著說爲圖以貽子孫此亦可見公之所存矣配安東金氏通德郎商翼之女翼元公士衡之後也有婦道奉君子無違先公卒而祔左舉三男二女男長秉正次秉敬次秉性女長適金長源次成瑯側室男秉植秉稷女適閔百逸鳴善翼善秉正出也範善任善廉善秉敬出也煥善熺善煒善秉性出也成子錫範閔子重熾餘不盡錄良浩少也識公面於稠坐知其爲貞介自好之士今其孫煥善從余

遊具公言行來請誌壙之辭謹敘次而系以銘銘曰惟士立心不欺而已以義處命何論榮利讓科不取視若弊屣爵祿可辭蹈刃是比再揚明廷獨行不倚瘠已腴民乃其餘事靡靡薄俗孰與公似勒石幽壟以裨惇史

僉知中樞府事崔公墓誌銘

并序

全州之崔起自羅代以神虎衛上將軍純爵爲上祖其後有完山君宰平度公有慶敬節公士康連世大顯於麗季國初蟬嫣爲著閔至諱廷吉以文章行義名世從兄文忠公鳴吉勸之仕不肯隱居教授學者

東溪集 卷三十三
稱西洲先生卽公會祖也祖諱後徵官縣監考諱錫
泰以文章幹局薦授 莊陵叅奉不就配全州李氏
叅奉弘蕃女以 肅宗丁亥生公公諱昌傑字漢輔
聰穎早秀十歲受書數百行讀四五過便通誦弱冠
屢發解不利遂棄舉業志古人之學師樗村沈先生
聞存心居敬之說日必冠帶危坐讀性理書以太極
圖主靜爲入道之基朱子中和第六書爲用功之要
循循有序動遵繩墨名其齋曰喚醒叅奉公晚居仁
川老且病家素貧公弊衣草屨力農漁以養之每得
嘉穀美酒輒手觴以跪進退與子弟飲自爲歌以侑

歡叅奉公和之其樂融如也一鄉稱其孝以經行薦
于方伯癸酉拜寢郎例遷別檢奉事直長仕滿陞主
簿都事己卯除清河縣監政以養民爲先勸農爲本
躬行田野穿渠開塍荒壤化爲沃土民至今賴之嘗
值大歉單誠賙救御史褒聞地本濱海僻遠士不知
學公設養老宴親行賓主之禮選置訓長秋冬教經
史春夏治功令行之數年文風大興多占大小科解
額人謂之破天荒甲申解歸卜居南山之下破席疏
食一如布衣時種藥蒔花彈碁賦詩以自娛辛卯復
健元陵令尋爲衿川縣監又以善賑稱癸巳換授陽

智縣監暫赴旋遞庚子以中子守魯侍從恩陞通政
階拜僉知中樞府事辛丑赴守魯康翎任所公與夫
人同年生大耋康強是年五月爲回轡之期二子袍
笏獻壽遠近傳爲盛事以六月十四日考終返葬於
仁川新峴山井里良坐之原夫人坡平尹氏判尹東
衡之女早襲詩禮之訓爲婦克敬教子以義劬躬成
家六親咸宜有古哲媛之德後公七年歿從公葬同
穴而左祔舉三男長守忱次守魯並文科正言季才
而殤三女歸李錫彬柳集基成老柱守忱男弘運守
魯男弘迪弘進弘遠內外孫曾數十人良浩以樗村

之甥少也見公於芝山學舍士友稱公爲務學實不
近名芝山去仁川一舍餘先生時或命駕從公父子
講說游泳而歸以是知師門之倚重公也暨在清河
不佞守月城疆相隣也聞公爲治用古道心竊敬焉
未幾公兩子連歲中進士襮僕來覲退土之人榮之
以爲善賑愛士之報于時不佞馳往賀焉賦詩志喜
同觀內淵之瀑留連信宿而返至今不忘于懷也南
麓之舍又與連巷步履過從便忘年焉竊覲公德性
寬和操履純正晚年氣象充然有自得之容及至耆
艾鬚眉皓白而韶華敷潤嘗謂子弟曰學者能從事

耳溪集 卷三十三
於九容九思則自然容貌端雅壽福可致每誦周茂叔光風霽月欣然慕之可見平日所養之深而終享壽祿有以也夫今正言兄弟次公言行來屬誌壙之銘感念疇昔義不敢辭乃銘曰

道散學弊循名騫外公獨爲已存誠直內在家在官無施不可父怡于堂民歌于野南山之下有梅有菊皜髮腴顏壽考寬樂英英雙壁簪花獻觴室家靜好孫曾繞床匪積曷致惟敬與儉勒石詔後我言弗僭

平壤府庶尹鄭公墓誌銘

并序

良浩童而孤門無期功之屬惟姑夫鄭公齒相隣志

相求親厚如骨肉遊焉學焉未或一日違也及長攻文辭同中司馬試旣而余策名於朝公乃沉淹郡縣中道傾歿獨余老白首矣每念疇昔爲之悄然累欷今公嗣子殷祥將瘞石于壙徵余銘遂揮涕而敘之公諱錫保字保汝系東萊爲羅麗大姓暨本朝東萊君蘭宗以佐理功大顯文翼公光弼以德望爲中興賢輔林塘公惟吉水竹公昌衍以文雅父子繼相門戶赫然世比漢之袁楊水竹生吏曹叅判廣敬是公高祖也都正諱采和僉正諱載道曾祖祖也考曰郡守諱潤先妣曰德水李氏都正鼎華女無育繼妣清

耳溪集 卷三十三
州韓氏郡守浹之女實生公於序爲二幼而穎秀不
煩繩督甫冠藝業已就 英宗丁卯登上庠癸酉調
孝陵叅奉序陞內瞻寺奉事濟用監直長漢城府叅
軍宗簿寺主簿戊寅爲青山縣監陞辭 上召見善
其周旋應對曰精詳人也爲邑乎何憂旣赴值壬午
大饑削薄廩轉隣粟闔境無瘠按使褒之曰民忘饑
訟無冤九考居最及瓜民立石以思乙酉辟授司僕
寺判官又稱職是冬除平壤府庶尹平壤國之西都
觀察使所治也冠蓋接焉財賄萃焉獄訟競焉公居
之以約御之以敏三年而績成內移爲通禮院引儀

轉 太廟令會尼城守黜有命簡其代遂遣公在官
半歲暴疾不興卽己丑三月十二日也距生年僅五
十一歲以五月五日返葬于果川龍虎洞面卯之原
公爲人端祥疏達宅心也直而諒接物也和而辨遊
於士友間風流藹然可見人人樂與之交居家有懿
行三世之宗皆貧不能祀公每之官奉祠版以往廩
宗婦婚孤兒及宰于西爲買田宅以業之推以及疎
親窮交亦致力焉咸倚以爲歸早嫻功令屢發解或
入高第而竟不中年又不長才不爲世用惜哉淑人
洪氏豐山世家郡守贈吏曹叅判芸窩諱重聖之女

卽良浩王考也男長殷祥生員今直長次敏祥才而
夭女婿士人申潞尹最烈生員韓復衍側室一女尹
恭鎮妻也殷祥娶坡平尹得秀女一男幼敏祥娶郡
守趙時淳女無子申子旭彬繪彬女適沈東賢尹二
女韓一男一女銘曰
吉乎其士良乎其牧西民載歌南民載哭竟折不揚
奚公之獨

德山縣監成公墓誌銘

并序

公姓成氏諱德求字克世昌寧人自麗稱盛閥至我
朝有聽松先生諱守琛風節高一代牛溪先生諱渾

爲東方儒宗滄浪先生諱文濬以道學顯連三世有
大名滄浪之子諱櫟司宰監僉正孫曰尙衣院僉正
諱熙胄以司宰公弟靖惠公諱櫻仲子承宗祀是爲
公會祖也祖諱至敏掌樂院僉正考諱範錫文科左
承旨世稱偉器而年不永官不長妣淑夫人星山李
氏正郎世璉之女高識懿行有女士風以 景宗辛
丑六月十日生公 英廟辛酉進士辛未丁外艱甲
戌除 翼陵叅奉轉義禁府都事童蒙教官義盈庫
奉事 宗廟署直長司憲府監察戊寅出爲德山縣
監壬午棄歸甲申丁內艱丙戌六月二十八日卒于

苦廬得年僅四十六公爲人沉靜粹雅喜愠不形泊然無嗜好惟以經籍自娛親老勉就祿仕而非其好也性至孝自幼時能左右就養長而愛敬俱摯居承旨公憂三年不脫衰絰未嘗見齒母夫人寢疾嘗糞驗其差劇及喪毀瘠幾危遇生朝就墓前伏哭竟晷是日敲炎如火不覺中傷因以暴下昇歸遂不起人見其哭處草盡枯死有一姊友甚篤饑寒共之在縣也分廩加厚曰同氣何可比妻子乎居官簡以臨下廉以律已民稱以冰玉其操公天姿近道繩尺不差而常存謙退不欲以學問自居時議或擬以儒選公

瞿然如不容承旨公亦力止之天不假年竟未得充其志人皆惜之搢紳章甫疏公孝行申禮部命旌其閭淑人青松沈氏縣監命哲女吏曹叅議壽亮曾孫柔順謹約教子以義方生後公一年歿于丁酉合葬于高陽蟾巖負乙之岡舉二男三女長鼎柱縣令次肯柱縣監女歸趙樂鎮生員林長浩李文鎬鼎柱二男近默次幼二女歸鄭海容金漢鍾肯柱三男進默退默次幼一女歸尹元鎮趙有繼子雲翮林有一子秉喆李有二子濟明濟 二女歸林敘鎮韓性履良浩少也見公於士友間容止端重文辭華瞻心竊期

以遠大不幸無命至今不忘于懷縣令兄弟皆佳士也條其遺事來屬志壘之辭撫念疇曩素嘗傾慕爲之愴悵謹敘其德行之顯於世者銘于墓石銘曰孝爲百行之首謙是衆善之受喪則自盡學乃不有溫溫恭人有確其守非百里才闕中身壽孰司其命而執其咎一丘蟾巖令名不朽

義禁府都事趙公墓誌銘 并序

余與趙士運居同閨自少遊甚驩旣而委禽於鄭氏鄭又趙之自出也得聞士運家世德美頗詳一日士運造余言曰吾王父有文有行不幸早世吾兄弟又

早孤厯識先人之面况王父懿範將於何考徵吾今掇拾一二傳聞作爲遺事欲乞幽堂之銘而長老盡矣知吾世者莫如子敢以是爲托余念通家之誼又悲士運之言不敢以無文辭謹按公諱明彬字士克趙氏出楊州自高麗判院事岑始顯有諱末生領中樞典文衡爲 獻陵名臣七世至昭敏公諱存性有二子曰惠穆公諱昌遠實 長陵國舅爵封漢原曰忠靖公諱啓遠刑曹判書贈領議政忠靖生觀察使諱龜錫觀察生大司憲諱泰東於公爲本生三世而公以大憲公命出嗣宗叔父禮賓寺正諱泰相後爲

耳溪集 卷三十三
承旨諱胤錫孫承旨卽惠穆公子也大憲公娶完山李氏牧使長英女以崇禎己酉十月十七日生公天姿峻正篤於孝友十二歲居寺正公憂哀慕如成人事兩夫人盡誠愛王母金夫人常歎曰吾兩世未亡人得久於世賴有此兒耳及長益自勵敦宗卹窮若不及尤致虔於享先之禮居家簡嚴身不設惰容口不出戲言婦人不干外事奴僕不入內庭所後外祖藥泉南文忠公有僕悍不可使遂歸之公則不加聲色而服事惟謹文忠聞而稱之曰御下有法真克家兒也初以蔭補敦寧府叅奉不就後除義禁府都

事遷氷庫別檢戊寅丁王母艱公時有胃病持制嚴甫闋疾遂革實庚辰十二月九日也嗚呼公之事情傳於家者止此而已誠寂寥可悲然以髫年承大宗事親無違奉祭以禮持身以簡治家以嚴此可以知公之大體矣惜乎天不與年官止一命無所表見於世今觀士運與諸姪子皆醇慤有故家風後屬浸以繁昌將大其家聲公之潛德厚報其在斯歟其在斯歟配南陽洪氏縣令澤普女領議政文簡公命夏孫領議政金公壽興外孫襲內外法家訓柔慎有婦德先公二年生後公十七年卒從公葬楊州金谷先塋

下舉二男二女男長榮先次榮後女長適郡守李著
迪次適郡守鄭錫者榮先二男鴻達鵬達俱縣監一
女教官沈鉞榮後無嗣以鵬達爲後二女李聖翊曹
允精李著迪繼子定濟三女正言鄭元淳韓光勲趙
廷禹鄭錫者一男得儉都事三女李長源大司諫洪
良漢生員李洪載鴻達男台鉉主簿象鉉正鉉女縣
監李敬倫鄭東喆鵬達男命鉉女曹遠振士運鵬達
字余洪良漢也銘曰
病不去經自盡於禮歿于旣吉非滅於毀非滅於毀
乃殉於孝惟其能孝是以有報

金川郡守鄭公墓誌銘

并序

東方之鄭爲三韓之甲族肇自東萊戶長文道見于
譜牒歷高麗多大官直提學賜始顯于我朝寔生左
贊成翼惠公諱蘭宗以佐理勲封東萊君子領議政
文翼公諱光弼遭際靖陵中興德業偉然稱國朝
名相再傳諱惟吉諱昌衍兩世繼登輔相寔爲公五
六世祖也高祖諱廣成官刑曹判書曾祖諱萬和禮
曹叅判祖諱載漢早歿取伯氏兵曹佐郎諱載海第
二子諱復先爲嗣卽公之考也官羅州牧使妣連山
徐氏郡守必成之女生六男公其季也公諱錫者字

德用以 肅廟丙子降己亥丁牧使公喪癸卯中生
員試丁未遭母夫人憂自是專心經傳無意仕宦甫
除服拜義禁府都事會有鞫獄勉出膺尋換童蒙教
官壬子陞瓦署別提癸丑移刑曹佐郎冬除兎山縣
監丙辰因有外補是邑者遞付軍衙丁巳除宗簿主
簿漢城判官俱以提舉姻婭遞戊午拜工曹正郎差
延勅郎廳遷戶曹佐郎除臨陂縣令大臣筵白仍任
戶曹旋除知禮縣監又以姻嫌遞癸亥拜翊衛司翊
衛冬除青陽縣監丁卯移安山郡守時值海溢一境
大無公割廩賑饑節用蓄力大修軍器摠戎使具聖

任閱武于屬邑褒啓請賞有陞敘之命壬申瓜遞甲
戌辟爲戶曹正郎秋拜金川郡守邑當新移之初吏
民凋殘逋穀積滯公衰年當敗局爬櫛釐革水土不
良轉成風痺乙亥求遞還京八月三日竟不興享年
六十葬于長湍與趙夫人墓坐午而合封焉公性度
寬和儀容頎脩有長者風範持身凝重居家簡約嘗
以祖先勤儉篤厚之風戒飭子弟良浩委禽於公門
嘗奉教於晚節見公處羣兄弟之間和氣融融宗族
皆同巷比屋情志孚洽凡有大事多倚公爲重知公
才器優於需世而早廢舉就蔭道終未克展布人皆

惜之良浩少僑寓湖中候公於青陽見公居官清嚴
謹守法度井井有成規綜理纖密巨細不遺愛民如
子各輸其情故訟庭如水吏民愛戴如父母前後累
典郡縣而歸橐蕭然尤篤於親親立約講信作爲傳
家之法今後承零替三子皆短折公之德美恐泯然
無知者謹序次其言行大畧納于幽宅悲夫公元配
楊州趙氏都事明彬之女國舅漢原府院君昌遠玄
孫生於丙子卒於甲寅舉一男三女男得儉進士都
事長女歸李長源仲女卽良浩妻季女歸李洪載叅
判繼配宜寧南氏鶴興之女生於庚子卒於癸卯葬

耐公右舉二男一女男時儉縣令行儉女歸洪景斗
判官得儉無子取時儉子東華爲後女歸趙良鎮進
士李心遠時儉子東華東壽行儉子東台女歸吳泰
心李重源洪茂榮李系子集龜女歸朴宗謙正言良
浩子樂源樂浚正言女歸李肅載李永翼佐郎李子
源明都事女歸申權宋啓程洪子魯淵晉淵銘曰
昔歐陽之銘簡肅言不華而意有餘我今年耄而筆
短視古人而百不如况公蘊於中而名不章施諸外
而才未攄何喬木之未榮歎梓樹之蕭疎斧斤兮莫
上隴德人之攸居

義禁府都事鄭君墓誌銘 并序

鄭君聖讓卽我夫人之弟也少從余學聰穎出倫未冠涉經史舉進士試於宦年未強仕而夭余至今傷之君弟時儉第次兩世年譜官歷來乞誌塋之辭文未及就而時儉亦歿何君家之無年至此耶遂揮涕而敘之君名得儉東萊大姓自麗朝光顯入我朝有諱蘭宗官左贊成東萊君寔生領議政文翼公諱光弼二傳諱惟吉諱昌衍連世登台鼎生諱廣成刑曹判書生諱萬和禮曹叅判寔君之高祖也會祖諱載漢祖諱復先羅州牧使以兵曹佐郎諱載海第二子

出後於季父考諱錫者金川郡守妣楊州趙氏都事明彬之女漢原府院君昌遠玄孫也君生於 英廟壬子甲寅丁母憂乙亥郡守公下世君居喪盡禮壬午中進士試丁亥筮仕除義禁府都事戊子換長興庫奉事移典牲署直長庚寅陞六品復入禁府冬感疾不起年廬三十九葬于長湍先塋丙坐之原君容止端凝志操堅貞言簡而氣和喜怒不見色篤於孝日未明整冠紳拱立寢門外問安否侍疾衣不解帶居憂持制甚嚴嘗以早失所恃爲至慟每遇忌日終宵齋服靜坐哀慕若喪之初事繼母南氏夙夜祇奉

正溪集 卷三十三
誠敬藹然季弟幼抱疾長益痼君親自扶持如嬰兒
嘗語二弟曰吾輩蚤孤奉偏親兄弟三人相依爲命
欲效古人同衾大被以終老二弟亦以吾心爲心也
在羣從之列年雖最少而飭躬修行詞華贍給達於
事務諸從兄每有疑輒問多從君言少業功令忽愀
然不樂曰學之成就惟在我之誠勤何必追逐交遊
因杜門端居與同堂兄弟相與講討爲文辭操筆立
就嘗爲金吾郎草囚供詞翰如飛諸堂僚皆斂手稱
其才華不幸短折未及一試於世惜哉君娶南陽洪
氏知敦寧應辰之女後君卒從君葬君無子取仲弟

時儉子東華爲後二女歸進士趙良鎮李心遠銘曰
敏而華溫而堅行則介心則專旣與之才又奪其年
奈何乎天

成均生員李公墓誌銘

并序

公諱著敬字汝一 中宗王孫龜川君晬抗節光海
時稱賢宗卽公高祖也會祖蓬山君諱炯信祖敦寧
都正諱堂考曰侍講院司書諱箕彥娶豐壤趙氏判
官命禎之女以 肅宗己亥三月十七日生公儀容
端正動止安詳不喜童子戲誠孝出於天嘗聞母夫
人邁疾於親庭驚泣不俟履而走省十四歲遭內艱

居憂盡禮若聞隣兒呼母之聲必汪然淚下事繼妣定省必拜癸亥司書公患忌疾公侍湯晝夜不懈涕泣禱天及遭喪無人乎側強糜粥躬執殯殮務盡誠潔祭奠之暇手抄禮書撰喪祭二儀定爲家式每當親忌服素終其月姑母喪哀慟如喪慈加服三月至親之喪貧無以葬者必出力以倡諸宗皆孝友之推也少志于學不屑舉業嘗從遊於安齋趙公震彬樗村沈公鎔之門集古訓之切於日用者分條列書名曰日用至訣體而行之非甚病必終日端坐未嘗設惰容又作自警文以檢身探討經旨善辨疑義儕友

多就質者司書公臨終語公曰吾死門戶替矣汝宜治功令期於顯揚公奉遺教勤攻學業丁卯中司馬而亦未嘗忘素學自號曰素窩以見志輪讀經傳尤致力於中庸處靜默修而聲望自著凡入銓選者二十四屢首擬而未受恩點搢紳士流莫不嗟惜或勸之改名公笑曰士豈爲一命得失而改名字乎李判書成中秉銓首擬齋郎而又未受點至於筵中白其文學行誼超出儕流朴諭善聖源一見公歎曰久聞其名今見其貌真玉如其人也嘗登泮製合考考官將置魁而偶失之及坼名莫不驚惜至末年公乃歎

曰自承遺教欲副先志廿載科日徒勞無成是亦命也從此杜門讀書以終餘年卜宅于終南山下期收桑榆之功癸未十月三十日以微恙不起得年僅四十五葬于南陽府東百老洞先隴側負良之原夫人青松沈氏縣令鏞之女子孫具見先誌今不疊載良浩少日識公於士友間熟聞內行純備操履精篤文辭特其餘事嘗有志於儒者之學而天不假年未克底于成區區祿仕亦復沉屈人或諉之於命而今其子若孫相繼登朝揚于清顯天之報施信不僭矣嘗聞長老言南谷李氏兄弟叔姪連薨接開金玉交輝

文彩照耀爲當世之所慕數十年來先輩凋謝後承寢微喬木之蔭蕭然荒落過者爲之指點而怛悵惟公之後獨傳家聲將振其先休校理君來請三世之誌余於是竊有感焉喜爲之述銘曰

靈泉發源其流必激嘉禾垂穎其實孔碩如彼莊士行高命嗇雖嗇于躬終遺遐祿子孫並揚有光前德單辭闡幽徵于墓石

成均生員李公墓誌銘

并序

良浩旣述止齋李公墓道之辭郡守君協聖又跽而請曰王考麗牲之石旣得公言而賁之惟先人墓草

耳溪集 卷三十三
今三十宿矣尙闕幽堂之誌以闡潛光而示後昆幸
公不棄諸孤敢以請終惠余雅重公家法之懿又感
孝子之誠按狀而敘之公諱宇益字舜佐時習齋諱
榮先之曾孫庶尹諱尙隣之孫止齋諱延德之子也
止齋娶朔寧崔氏翰林致翁之女以 肅廟甲申四
月二十一日生公以父命出後於堂叔父刑曹佐郎
諱延大妣曰川寧俞氏夢錫女王考曰通德郎諱尙
民公幼而慧十四盡涉經史初受尙書能推解朞三
百註止齋奇愛之遂用力於經學凡天人性命陰陽
理數之奧專精討蹟期於通解旁治公車業屢中大

小解額尤工駢儷間嘗鬼捷而丁卯始登庠庚午遭
止齋公喪丙子又丁崔夫人憂哀毀成疾見者悲之
服畢黽勉赴舉壬午 上謁文廟試士公卷登第四
五會有日變只取三人考官坼見落卷爲公嘆惜焉
自是絕意科宦以經籍自娛乙酉七月十五日卒始
葬于任實縣鉢山丁酉移窆于全州府西負巽之原
公以法家子早襲庭訓事親盡愛敬有弟嬰奇疾晝
夜救護累年如一日鄉里感嘆精於窮格之功博聞
強記如星曆籌數等書靡不究解嘗於戊寅至日見
已卯新曆謂人曰置閏錯矣及其改頒公言果驗而

深自歛晦不使人知守拙安分與物無競人稱止齋
肖子而屢舉不第以韋布終豈非命耶公聘長澤高
氏忠烈公敬命之後奉直郎漢慶之女生於節義之
家婦道咸備有女士風後公十四年終葬從公左舉
二男一女女適縣監尹光柱男長卽郡守出系次侃
聖郡守二男長揆泰出系次揆觀尹光柱三男恒基
進士性基心基女適權丞銘曰
學能鉤深名父之受才不華身司命之咎坐數歸餘
巧曆袖手謙乎若無困而自守惟其不有歸羸于後

淑夫人密陽朴氏墓誌銘

并序

夫人密城朴氏自麗朝爲冠冕族入我朝有諱鼎元
當光海時知咸平縣斥湖儒凶疏清議多之後贈大
司諫邑人祠焉是爲夫人高祖也會祖千榮掌樂院
正祖重圭羅州牧使考敦義進士有德弗施妣綾州
具氏都事廷柱女以 肅廟癸酉七月三日生夫人
幼而敏慧能料事得失慈仁愛物嘗隨母舟行見巨
魚四五繫船尾潑刺有聲夫人愍其將烹也截索而
放之守隸皆懼夫人告其實遂不抵罪父母奇愛之
十六歸于丁公可慎奕世名家也選生員不第尊舅
曰承旨道復夫人事夫子以禮奉舅姑以孝處娣妹

得歡心教子女盡義方親黨莫不敬服及子志德官于朝夫人年躋九十例封淑夫人 上聞之特命陞志德六品授一縣以養老於是得鎮川夫人泣謂志德曰 君恩至此汝曷其報惟子小民慎刑獄毋負聖上如傷之仁志德拜受命邑人咸蒙其惠丁未限滿奉夫人還京第以五月二十一日考終享年九十有五七月權葬于龍仁蒲谷尊君墓域內戊申十月以禮祔左舉三男四女男志聖志德志忠女適進士朴東顯士人崔寅孝佐郎李瑞朝判官柳詢志聖有一女無男以志德子載簡爲後女宋圭信妻志德三

男載簡載翼載容志忠二男三女載吉載喆女崔陽重尹綺韓錫勛妻曾玄不盡記夫人氣性溫粹通識道理篤於奉先治家有法預備籙實務極豐潔手執女工至老靡懈每遇先忌八耋猶素食進士公無嗣而歿一女惟夫人而已親黨欲循國俗屬夫人奉祀夫人不可及定所後教誨而成立焉嘗謂世祿之家當與國休戚曩歲國有大事中外憂遑夫人聞之爲廢寢食見鄰人笑語如常蹙然不怡曰此何時乃爾聞者愧服良浩先墓在鎮川時節往省聞輿人之誦皆稱太守之賢推孝以爲政實由母夫人之訓心竊

耳溪集 卷三十三
欽歎謂有古哲媛之風焉聖人之言曰仁者壽夫人之壽近百齡其積仁之驗歟今鎮川公甫免喪來乞誌壙之銘余何忍辭銘曰

惟天降壽惟德乃受溫如夫人其德克有九齡有五令婦壽母聲達 聖聰惠登民口榮誥自天彩服墨綬有女回春侑我春酒振振孫曾永昌厥後敬作銘詩以勸悠久

孺人青松沈氏墓誌銘

并序

李學士遇濟遭母夫人喪既葬曳衰踵余門泣而言曰小子不天不能長侍慈顏平日嘉言懿行倘使泯

翳於後則重不孝之罪而無以少洩窮天之痛矣先人墓道之辭前已蒙幸於執事之筆敢乞一言闡揚以卒終始之惠良浩跼而敬對曰惟余文不足發揮言不足徵信是懼何敢拂孝子之托乎仍又展其狀而讀曰吾母青松沈氏新溪縣令諱鏞之女大司諫金公諱啓煥之外孫也天賦聰慧幼時傍聽長老授蒙學輒通解其音義十七歸于我先君諱著敬先君有文不第安貧讀書先妣勤苦拮据不以家事累先君時先祖考暨繼祖妣在堂竭誠奉養飲食適溫冷衣服時寒燠祖考每稱孝哉婦也丙寅縣令公在新

耳溪集 卷三十三
溪疾劇先妣聞而驚泣齋沐夜禱于關王廟夢有告
曰誠孝雖可感奈天命何後數日凶問至嘗手錄考
妣遺事一通傳示子女篋中出三封而授不肖曰一
是吾先妣遺衣也一是吾先考遺書也一是尊舅書
札也將於死後奉而歸獻留以納吾柩中也不肖晚
竊科名三爲西邑板輿過親山必榮掃以伸情禮每
對官供輒愀然不怡曰吾與汝大人一生食貧今獨
受榮養寧不傷哉小子將營壽衣泣諭曰吾先妣家
貧薄歛尊舅之喪亦不用綾緞今雖官備豈忍侈於
前乎每當先忌灑掃庭宇手滌祭器必思常時所嗜

熟而薦之戒婦女曰祭貴潔不在豐苟不潔不如不
祭其奉先之誠如此先祖妣早世兩姑母皆幼先妣
撫育而成就之尺布斗粟得輒均分姑母感其恩愛
事之如母每受月俸徧及於內外親族有告婚喪極
力厚助其敦親之誼如此教子女有法度禁遊敖兒
孫輩纔學語口誦小學章句以教之每冬令讀書於
山寺夏則使肄業於文士家力供糧饌不肖得占大
小科第皆母氏教訓也不肖回甲奉觴獻壽先妣撫
頂而笑曰豈料年滿八十見汝周甲乎人皆羨慕稱
厚德之報至己未四月十九日以宿疾棄子孫享年

五溪集 卷三十三
八十一禮月祔葬于南陽百老洞先君墓左舉三男
二女男長卽遇濟前校理次榮濟爲仲父后天次升
濟爲季父后女長適正字沈樂亨次生員趙琦采遇
濟二男長東萬今正言次東九爲榮濟后女長適朴
弘源次曹玄振升濟二男一女長東順餘皆幼沈繼
子魯一三女適趙雲畚李鼎弘崔弘健趙子謙煥東
萬一男二女嗚呼先妣儀容端莊性度慈良動合女
則平居淨掃房闈衣裳器什井井有恒處手執女紅
未嘗暇豫言辭不及於鄙俚巫卜不近於門庭親黨
咸稱以女中君子其餘言行不可殫舉惟作者之裁

採焉良浩喟然而歎曰懿哉閨閣之德近世所罕聞
也宜其始艱而終亨克享大耋備受榮祿長孫釋褐
佳婿登庠下至曾孫誥誥繞膝餘慶猶未艾天之福
善信不僭矣謹盥手而爲之銘曰
婦人之德厥有四美孝以爲基敬以爲軌悖以收族
儉以潔已四者克備百祿攸萃惟其有之是以致之
李氏之後其益昌熾乎

耳溪集卷三十三 終



